

MUQÂQIŊ DÂŊ

Papia irec magnaŋ dâŋ qâreŋkekiecne forakac i gâcne sâko Salomozi qâreŋkewec, â dâŋ gâcne bocjaha ine ŋic gâcne jaŋe zuhuckerâ qâreŋkembig. Dâŋ qâreŋkekiecne forakac izi Salomo â ŋic gâcne maŋqârân-jegicte fuŋne bataniŋkekac. Papia magnaŋ maŋqârân dâŋ bocjaha fokac hâcne. Erâ maŋqârânge fuŋne ziŋuc mukicne: "Moc maŋqârânhec juzo murâ Anutu araŋ bacnehuc juzejec." Salomozi muqâqin dâŋ buc buc mu qâreŋ ewec irec zare 3000, erâ i zira mi râe-fârekicne. Erâ dâŋ mufârewec i mitiopec sawa mâcne, ŋic juju â eebapaopec mâmâc rakac.

Papia magnaŋ dâŋ forakac i bâfâuckepene biri kâcqeŋe 5 fuakac, ine kecziŋuc:

Biri 1 i gaŋ 1-9.

Biri 2 i gaŋ 10 - gaŋ 22:16.

Biri 3 i gaŋ 22:17 - gaŋ 24.

Biri 4 i gaŋ 25-29.

Biri 5 i gaŋ 30-31.

Biri namba 1 irec magnaŋ dâŋ forakac ine kecziŋuc: Mu qaqazuc â muqâmoc dâŋ sasawa, erâ i dâŋ zozorice â oomane. Sasecte â sâqocnere uŋdâŋ, Anutarao qohotahuc maŋhuhug juju, erâ e araŋ babacne â mai eecne irec muqâmoc â babaafec dâŋ hâcne.

Biri namba 2 irec magnaŋ ine muqâqin dâŋ fârine â biri zora fokac, muqâqin dâŋ buc buc 376 fokac hâcne. Erâ i ŋic jaŋere juju â eebapa honehuc ira iticnerâ mu qâreŋ ekicne. Juju â eebapa kecziŋucte muqâqin dâŋ fokac: Ŋic hesarac gie, naru motec mu bâtiŋ eejare, ŋowe ŋonâŋ jujuo ŋonâŋzi jume biankeme ŋowenere eri bian ee, namenti fuŋne â tâpiri, wiac sâcti qâtiri ee, ojon jujure dâŋ, âbârâ ŋiczi gie sioc â eeatuc tâmiric bapa, erâ dâŋ wiac gâcne gâcne.

Biri namba 3 irec magnaŋ dâŋ forakac i biri 2 ira dâŋ fokac irec âgone jaha. Erâ wâc waŋ opâ âmbân nânâ, â sasec gie â wiac hâhâwicne fuame sowine mumu irec uŋdâŋ.

Biri namba 4 i Hisikiazî ŋicwofuŋ juhame mu qâreŋ ekicne. Erâ dâŋ forakac irec qizecne ziŋuc fokac: Zoagne wiac ebac eengopenen irec muqâmoc â babaafec dâŋ.

Biri namba 5 ira ŋic moc zâŋene Aguru ere muqâqin dâŋ gâcne fokac, erâ ŋokac moczi ŋokâ-ticne ŋicwofuŋ Masa e uŋsawaŋ â muqâmoc dâŋ ecnekac. Tataranaŋ ine ŋokac moczi ŋowe-ticnehec jume biankeocmu irec mumuten dâŋ bâfuangopenen.

Muqâqin dâŋ i maŋqârânhec jujure dâŋ fâri hândâŋne moc

1 Dawidire ŋokâ Salomo, Israe ŋicwofuŋ hâcne, ere muqâqin dâŋ sasawa zi.

² Muqâqin dâŋ zizi maŋqârân â mumutâc dâŋ bianne hone mana tarac enaŋte â dâŋ qame hukicne wâc mana taranaŋte bafic-nâpooocmu. ³ Dâŋ izi hâcne weniguc erâ mamaŋahec juzo â siocmâc tiŋne â bianne juju irec fuŋne sâcne qazu-nâreocmu. ⁴ Ehuc ŋic babitiŋicne jaŋe jujure fuŋne jaza mutâc eha maŋfârihec eniŋmu â ŋic socqârî jaŋe wâc mamaŋa â maŋqârân qazu-jareocmu. ⁵ Eham maŋqârânhec jaŋe dâŋ zi wose manac epie

mamana-jenŋic fua qârânkeocmu, â manfânânheh jaje wâc bafic-jopahuc juju hata biangao jowa qataŋ ejareocmu. ⁶ Ehamē muqâqīŋ dāŋte fuŋne â ŋic maŋqârânheh jaŋere dāŋ herâricne â suŋsuŋne i sâcne mana taraniŋmu.

Ŋic socqâri jaŋere uŋsawaŋ dāŋ

⁷ Wofuŋ araŋ babacne izi maŋqârânŋte hata fufuŋkene ekac. Ŋic mutuc matacne jaje maŋqârân dāŋte manapie wawahane eha mananiŋte takic-jopaekac.

⁸ Motec-mae, go mamacgezi dāŋ gaza qazuc eekac i manazemec, â nenŋocgezi dāŋ muekac irec hazec wâc râezemec. ⁹ Iŋuc ehuc jahere dāŋte manatec qizecgere eridu â upegere qoqonaŋ ezejec. ¹⁰ Motec-mae, go ŋic sindaŋne jaje esâicgupie mi docke-jarezemec. ¹¹ Jaje ziŋuc mecne gazaniŋmu: “Ajoc, go waretec ra ŋic maŋhumuc e me e bâfuarâ qâhâmonaŋ. Nânâc ŋic biane fuŋne tâmiric mâc qâhâmonzepenē. ¹² Jaje biane â qiqicne juhapie bâfuac-joparâ jopapene hâmorâ foranzepieŋ. ¹³ Ehamē moneŋ mafa wiac-jenŋic fuŋne fuŋne bâfuarâ ficnâŋecko râe guruc epene fusucmazejec. ¹⁴ Irec ware qâtec-nâpoc, eme wiac fiuc ronaŋmu sâc bâtâc banzepenē.”

¹⁵ Motec-mae, go ŋic iŋucne jajeheh mi juhuc dic bajarezemec. ¹⁶ Jaje wiac hehesicne eniŋte zoqac erâ zikare gongoricne heengopieŋ. ¹⁷ Jaje zoaŋko wipe jaje honec-jopahapie ufic fârepie mi jowanŋmu. ¹⁸ Ŋic iŋucne jaje burec ehuc jaje jaŋacne bitiŋ râepie kicjopaocmu. ¹⁹ Ŋic zika qahuc wiac fiuc ronŋmu jaje zikare biŋe jaha eniŋmu, fiuc roro jaje iŋuc hâcne fua-jareocmu.

Maŋqârânheh jujure fânoc hehe dāŋ

²⁰ Manangopieŋ, maŋqârânzi ŋic baafec-jopaekac jaje hata upeo me hae zoŋao maŋqârân dāŋ muengopieŋ. ²¹ Erâ haesac motâcko â ŋic tutumaŋko maŋqârân dāŋ musokaengopieŋ wâc.

²² O ŋic mutuc matacne! Ŋoŋe mutuc-ŋenŋic i mo damaŋko moc omaeocmu? Me mamana sâkore mu âke sisic ehuc mamana qiqikiŋ i wezimucko moc beheniŋmu? ²³ Ŋic maŋqârânheh jaje mu bâtiŋ eŋarepie dāŋjenŋic mananzepieŋ, jaje hâcne uŋ sawaŋ biane eŋarehuc ŋoŋe wâc mamanaheh eniŋte dāŋ ŋazaengopieŋ. ²⁴ Jaje wira hefârec eŋarembiŋ, ehamē ŋoŋe ine dāŋjenŋicte hazec mi râembiŋ, â mejenŋic sicne-ŋarepie mi rombiŋ. ²⁵ Ŋoŋe uŋsawaŋ dāŋjenŋic qâsuahuc mu bâtiŋ eŋarezo mupie takic-ŋopame qikiŋnembiŋ. ²⁶ Irec sisipiric fua-ŋareme honec-ŋoparâ gâwie-ŋarenŋmu, â wiac hâhâwicnezi fai-ŋenŋicko feme mu âke sisic eŋarenŋmu wâc. ²⁷ Wiac izi mângân qicwânzânheh iŋucne fisi-ŋarehuc zâic fâro â zârâ hârŋ bâfua-ŋareme iŋuc hâcne eŋarenŋmu. ²⁸ Iŋuc fua-ŋareme maŋqârânŋte wira wâwâsic epie arictac eocmu. Ehuc ira me ira maŋqârân bâfuanŋte basa-bipieniŋmu hâcne. ²⁹ Ŋoŋe damaŋ sâc maŋqârânŋte manapie wiac wawahane eha Wofuŋ araŋ bacnenŋte takic-ŋopame qikiŋnembiŋ. ³⁰ Ŋoŋe uŋsawaŋ dāŋjenŋicte moc mi eŋareha mu bâtiŋ eŋarezo mupie râŋgenkembiŋ. ³¹ Irec ŋoŋe juju bapa-ŋenŋicte fârŋine rohapie wiac ebac embiŋ irec okacne fisi-ŋareocmu hâcne. ³² Ŋic mamana tâmiric jaje maŋqârân dāŋ qikiŋneengopienŋte hâmoniŋmu, â ŋic mutuc matacne jaje manabâc tâmiric kosa juengopienŋte sipirickenŋmu.

³³ Maŋqârân dāŋ mana maŋ eocmu ŋic ekj ine hâhâwic tâmiric wama faio juhâc qâhâmooocmu.

Maŋqârânhec juju irec fârîne

2 Motec-mae, no dāŋ gaza qazuc ekopac i manazemec, ehuc wiac i me i ecmurâ gazape mi nîkecguzejec. ²Go maŋqârân dāŋte hazec râezemec, ehuc mana taracmurâ esâickehuc giene bazemec. ³Erâ mamana saric â maŋzi wiac mamana tara fua-gareocte nunumu gie bazemec. ⁴Go siliwa moneŋ me boreŋ zegaŋ duckekicne bâfuacmurâ babasa gie banzaŋ, irec sâc jaha giene batec mamana fua-garezejec. ⁵Iŋuc ecmuo ine Wofuŋ araŋ babacne irec fuŋne mecne, â Anuture fuŋne i māmâc mana taracmu. ⁶Maŋqârân i Wofuŋzi tahac-nâpoekac, erâ mamana saric â mamana tara i eraonec jaha ware-nâreekac. ⁷Eki hâcne ŋic tiŋne â siocmâc bafic-jopaekac â ŋezic-jopaekac. ⁸Ehuc, ŋic âgofâc-ŋeŋic bafic-jopahuc dāŋŋeŋic mûtiŋne-jareengopieŋ ŋic i jaŋe sapec-jopaekac, â e jahacnao qohotahuc juengopieŋ jaŋe hone soŋaŋ ejareekac.

⁹Go maŋqârân dāŋ manacmuo ine wiac biaŋne â tiŋnere hata hone taracmu, ehuc irec sâcko ebac ehuc jucmu. ¹⁰Erâ go maŋqârânhec jaha jutece mamanaŋezi bubiaŋ bâfua-gareocmu. ¹¹Mamana saric â maŋzi wiac mamana tara izi ŋezicguocmu, ¹²ehuc wiac hehesicne ezicte aka hegareocmu. Ehame ŋic dāŋ kosa muhuc bâbâsifuc bâfuaengopieŋ jaŋerao ra qohotazicte hata hebâzickê-gareocmu. ¹³Ŋic iŋucne jaŋe dapâcte hatao juiŋte tiŋne juŋure hata râpeckeengopieŋ, ¹⁴erâ wiac hehesicne ehuc bubiaŋ manaengopieŋ, â wiac sindaŋnere aŋac bajuengopieŋ. ¹⁵Jaŋe hata-jegic keke poricne â hatagân-jegic i bac bâŋoricne.

¹⁶Go maŋqârânhec jucmuo ine ŋokac sâqocnezi dāŋ wokemaŋzi wiac ehuc esâicgume sâcne sanaŋkerâ dāŋticne hetapâickecmu. ¹⁷Ŋokac iŋucnezi ŋowe-ticne maŋzi beheekac, ehuc mumupaŋ dāŋticnere wâc nîkeckeekac. ¹⁸Go ŋokac ere ficko moc racmuo ine hâmoc haere hatao racmu hâcne. Manakic, ere ficko rara izi hâmockicne jaŋere mâreŋko rara irec sâc ekac. ¹⁹Ŋic moczi ŋokac e iŋickeocmuo ine mocwâc mi risieocmu, ehuc juju hata mocwâc mi bâfuaocmu. ²⁰Irec go ŋic biaŋne jaŋere itiroc bâjâpehuc tiŋne juzemec. ²¹Ŋic tiŋne â bahacmâc jaŋe hâcne mâreŋko damaŋ zora juŋenigmu. ²²Ŋic sindaŋne jaŋe ine Anutuŋi hofâ qinziŋ iŋucne mâreŋkonec unuc-jopahuc bâsirowec-jopaocmu hâcne.

Ŋic socqârî jaŋere uŋsawaŋ dāŋ

3 Motec-mae, no dāŋ gaza qazuc eekopac irec moc mi nîkecguzejec, â wiac ebac ecmurâ mutâcne-gareekopac i manasuhuc juzemec. ²Dāŋ wiac qazu-gareekopac i bajucmuo ine damaŋ zora juhâc qâhâmocmu. ³Go âgo miriŋ â siocmâc juju i moc mi râpeckezemec, ehame izi hâcne upegere qoqonaŋ â maŋgere foŋiŋ erâ fozejec. ⁴Go iŋuc ecmuo ine Anutu mecne â ŋic jaŋe mecne māmâc mana-garepie biaŋkeocmu.

⁵Go gahacne mamanao mi roweckehuc Wofuŋte dapenŋo soŋkerâ juzemec. ⁶Erâ wiac sasawa ebac ehuc Wofuŋte manasuzemec, eme eki juju hata fâreŋiŋ jaha gaza gowatuc eocmu. ⁷Go mamanaŋere manatec fefene boc mi ezejec, ehuc wiac hehesicne râpeckehuc Wofuŋ mocjaha araŋ bacnezemec. ⁸Go iŋuc ecmuo ine izi hâcne nârâ bibiaŋ irec sâc

egareha wicge somieocmu â zâicge wâc mâtenkeocmu. ⁹ Giegangao nânâ monzaj wiac fuaekac sâc irecnec biagne gâcne rorâ bâzi rikehuc Wofuŋ muac baafec ecnezemec. ¹⁰ Go iŋuc ecmuo ine nânâficgezi fufusuc jaha fooocmu, â waiŋ giegao mazuc mâriri fuame ficge hefusetec tiwâne fooocmu.

¹¹ Motec-mae, Wofuŋzi bâtingume manatec wawahane mi ezejec. ¹² Wofuŋ e ŋic moc jaŋŋkezo murâ ba bâtiŋ ecneekac; e mamac moczi ŋokâ-ticne qa bâtiŋ ecneekac irec sâc eekac hâcne.

¹³ Ŋic moc maŋqârâŋ â mamana tarahec juekac ere manape zerine ekac. ¹⁴ Wiac izi hâcne siliwa â gol jahere sâc sirickehuc wiac furi sâko jâmbân ekac. ¹⁵ Maŋqârâŋzi qânâ furi sâko irec sâc wâc jâurukac, â wiac i me i bajuzo muekic izi irec wahamicne. ¹⁶ Maŋqârâŋzi juju damenŋe bâzoraocmu, ehuc monen mafa â zâŋe biŋe wâc bâfua-gareocmu. ¹⁷ Maŋqârâŋhec juocmuzi bubiaŋ â wama faio juocmu. ¹⁸ Maŋqârâŋhec juiŋmu jaŋe juhâc qâhâmoniŋmu, ehame izi hâcne juju fârine bâfua-jareocmu.

¹⁹ Wofuŋ e maŋqârâŋhec jukacte
mârenŋe hobeten râewec,
â mamana tara focnekacte
qânikij qaratiwec fokac.

²⁰ E maŋqârâŋheczi mume opâ jaŋe fisiŋgopien,
â karoraczi opâ hoŋkeme mârenko hoe wahaekac.

²¹ Motec-mae, go maŋqârâŋ â mamana tarage soŋaŋkehuc juhanŋtec moc mi sifucke-garezejec. ²² Wiac izi hâcne juju biaŋ â jujuhâmo bâfua-gareocmu. ²³ Go iŋuc ecmuo ine hatagao sâcne racmu â kikege wâc mi fâfâcguocmu. ²⁴ Go wiac irec me irec mi hâwicguha waha guŋ biaŋne fohanŋtec hae fureocmu. ²⁵ Ŋic sindaŋne jaŋere wiac hâhâwicnezi mârâŋ qicwânzâŋnehec iŋucne fisiekac, irec sâc jaha ututuŋ fisi-garezacte mana mezac mi ecmu. ²⁶ Wofuŋzi hone soŋaŋ egareha sâcne jucmu, eki hâcne wiwiticko fezicte kikege sapeckeocmu.

²⁷ Go tâpiri fogarekac sâc ŋic qarâ suriŋne jaŋe ehâmo-jarezemec. ²⁸ Go miŋecgac jaha ŋic âgoge bafickezo manasukicko tomâckore biŋe mi râetec fozejec. ²⁹ Me ŋic âgoge moc gorao roweckehuc maŋfungao juekac e râsi ecnehuc wiac sâqocne moc mi ecnezemec. ³⁰ Ŋic moczi wiac hehesicne i me i mi egareha fuŋne tâmiricko ehac dâŋ mu qaqatarac mi ezepirec. ³¹ Ŋic zâzâicne tâpiri-jenigte iŋguuŋ mi ejarezemec, ehuc jaŋe wiac eengopien irec sâc jaha mi ezemec. ³² Wofuŋzi ŋic hehesicne jaŋe hâcne qaisoc-jopaekac â ŋic tiŋne jaŋe ine âgo ejareekac. ³³ E ŋic sindaŋne jaŋere fic hae sâweckeekac â ŋic tiŋne jaŋere ine jambuŋkeekac. ³⁴ Ehuc ŋic mu âke sisicne jaŋe gâwie-jareekac â maŋhuhuŋ juengopien jaŋe ine mana biaŋ-jopaekac. ³⁵ Ŋic maŋqârâŋhec jaŋe zâŋe biŋe sâkohec eniŋmu â ŋic mutuc matacne jaŋe ine mimi busâqoczi fai-jenicko feocmu.

Maŋqârâŋhec juju irec fârine

4 Motecfâc-nane, ŋoŋe mamac-ŋenŋic noni wiac ŋaza qazuc eekopac irec hazec râerâ mana hâmoniŋ, ehuc maŋzi mamana tara bâfuanzeŋien. ² Wiac qazu-ŋareekopac i biaŋne sasawa, irec manasuhuc junzeŋien. ³ No nengoc mamac jahec-nane jahere motec wârâŋne mocsâkoa juhape ⁴ mamac-nanezi wiac qazu-narewec. Ehuc dâŋ ziŋuc naza jujec: "Dâŋ gazaekopac sâc irec ninikec moc mi bâbâfua manasuhuc

juzemec. Erā sâcmutâc dâŋnane mana rereŋ ehuc sâcne juhâc qâhâmocmu. ⁵Go maŋqârâŋ â maŋzi wiac mana utuckehuc mamana tara i bâfuazemec, ehuc dâŋ gazaekopac i mi qâsuazemec. ⁶Go maŋqârâŋ mi râpeckecmuo ine izi hâcne sapecguocmu, â mana maŋ ecmuo ine soŋaŋguocmu. ⁷Manakic, go maŋqârâŋhec ecmurâ 3oqac sâko ezemec, 3oqac izi hâcne maŋqârâŋhec jujure fufuŋkene ekac. Go wiac irec me irec mâcne, maŋzi wiac mamana tara irec manatec furi sâko eha bâfua-jâmbâŋkezemec. ⁸Maŋqârâŋ dâŋ mana maŋ etec izi zâŋe biŋe sâko bâfua-garezejec, â maŋzi hâpo heârŋ ecnetec eri qoqonange eocmu. ⁹Go iŋuc etec eri hendiŋ â eriduge eocmu hâcne."

¹⁰Motec-mae, go dâŋnanere hazec râec, ehuc dâŋ gazaekopac sâc manatec fârine eha bajuhec dameŋ zora jufezemec. ¹¹No maŋqârâŋte fuŋe gaza gowatuc epo, ehuc siocmâc jujure hatao jowacgupo. ¹²Irec go hatagao rahaŋtec wiac moczi aka moc mi hegareocmu â gasackerâ racmuo ine kikege wâc mi fâfâckeocmu. ¹³Wiac qazu-garekicne irec manasûhuc juzemec, â mamana bâfuameŋ izi hâcne jujuge dopeckeekacte biaŋne soŋaŋkezemec. ¹⁴Go ŋic hehesicne jaŋere hata mi âtezemec â ŋic sindaŋne jaŋere itiroc wâc mi bâjâpezemec. ¹⁵Go jaŋere hata râpeckerâ dic bacnehuc wiac hehesicne mi ezemec, iŋuc ehuc gahacne hatao zuhuckerâ razemec. ¹⁶Ŋic sindaŋne jaŋe wiac hehesicne mi eniŋmuo ine guŋ sâcne mi foniŋmu, â ŋic moc mi bâzâickeniŋmuo ine guŋqâri jaha foniŋmu. ¹⁷Wiac sindaŋne â zâzâicne ebac ee izi hâcne nânâ opâ-jenic eekac.

¹⁸Ŋic tiŋne jaŋere hata i furic oŋa rarac iŋucne, oŋa rarac i 3oŋ wefume fuŋkerâ mâreŋ tamae rahuc hae fure-fâreekac. ¹⁹Ŋic sindaŋne jaŋere hata ine dapâc qisiric iŋucne, irec jaŋe wiac izi me izi kike-jenic fâfâckeme waha jopaekac i mi hone taraŋgopier.

²⁰Motec-mae, go hazec râe-hâmohaŋtec dâŋ gazape manazemec. ²¹Go dâŋnanere ninikec moc mi bâfuahuc maŋzi mana sakac ezemec. ²²Moc e dâŋnane mana tarahuc bajuocmuo ine izi hâcne nârâ bibiaŋ-ticne ehuc juju bâfuacneocmu. ²³Go mänge soŋaŋkezemec, izi hâcne juju bâbâfuagere hobetegne ekac. ²⁴Erâ go burecdâŋ moc mi muzemec, ehuc mumusufuc â eeatuc dâŋ wâc mi bajuzemec. ²⁵Go dunduŋ dadape fihuc mâcne, zâŋe dândâŋne fihuc wiac maicgurâ fokac i honezemec. ²⁶Go wiac moc ezo murâ mana-hâmohuc etecne fârine biaŋne fuaocmu. ²⁷Ehame hata hehesicne qikiŋnerâ tiŋne hatao âtehuc ŋifec me ŋifec qâsorierâ razic wefuc mi ezemec.

Boe sau gie bapare uŋdâŋ

5 Motec-mae, go hazec râehuc maŋqârâŋ â mumutâc dâŋnane manazemec. ²Go iŋuc ecmuo ine weniguc erâ juju biaŋne bâfuazo i mana taracmu, ehame dâŋmumugezi mamanagere fuŋne mutaniŋkeocmu. ³Manakic, boe sau ŋokacte dâŋzi baŋac iŋucne aŋacnehec eekac, e micticnezi wokemaŋ dâŋ muziziwehuc muekac. ⁴Irec go qanaŋ dâŋticnere manatec aŋacne eocmu, zâhec ine gorao kegoc hâtâne me sâqe bune râpene mictara irec sâc eocmu. ⁵Ŋokac iŋucnezi hâmoc haeo jowacgu raocmu, e hata ira hâcne raekac. ⁶Ŋokac e jujure hataoa mi juekac, erâ go hone manac mi ecnehaŋtec qâsorierâ kosa barasa raekac.

⁷Motec-mae, no dâŋ gazakopac 3i manarâ moc mi nikecguzejec. ⁸Go ŋokac iŋucne dic bacnehuc ficticnere motâc moc mi maickezemec. ⁹Sifu

ecmuo ine zāŋe biŋegezi ŋic gācne jaŋere maio wawahane eha socqāri jaha juhuc ŋic jaŋere meo fetec mi akicguniŋmu. ¹⁰ Ine hācne, ŋic furune jaŋe monēŋ mafa wiacge gowac rohapie gie bahuc wiac hure-fāremēŋ i gācne jaŋere biŋe eocmu. ¹¹ Wiac iŋuc fua-gareme hāmozo erā kio huse ehuc dāŋ kecziŋuc mucmu: ¹² “Jei, no mu bātiŋ enarezo mupie wemocte qatarapo, ehuc uŋdāŋ-jeŋic mi manapo? ¹³ No qaqazufāc-nane jaŋere dāŋ wemocte qikiŋnepo ā ŋic wiac naza qazuc embiŋ jaŋere dāŋte hazec wāc wemocte mi rāepo? ¹⁴ No iŋuc ehuc ŋic ŋondenko juhape ututuŋ jaha mimi qaqa fai-naneo fezo ewec.”

¹⁵ Go gahacne ŋonāŋtao qohotahuc maŋge erao sawa rāetec fozejec. ¹⁶ Ŋokac gācne jaŋehēc juhuc naru motec bāfuac-jopacmu jaŋe āgo egarehuc sācne mi baficguniŋmu. ¹⁷ Naru motecfācge jaŋe soka-fārerā ŋic furune moc mi bafickehuc go gahacne sawa baficguhuc junzepieŋ. ¹⁸ Irec go ŋokacge naru zeŋoŋ jaha rotec ŋonāŋge ewec ehēc bubiaŋ faio jaha juzepirec. ¹⁹ Ŋokac e gājoŋ seren hawari biaŋ ā totoc farā tacnezi āgo jaun egareme bubiaŋ manazemec, erā e gore ecneha jaun bacgume manatec sāckezejec. ²⁰ Motec-mae, go wemocte ŋokac kosa jujune erao maŋge rāetec foocmu, me wemocte ŋic mocte ŋokac hāpohuc susu-ticne ro fāre ecmu? ²¹ Manakic, Wofuŋzi wiac ebac eekomec i hone-fāreekac, ehuc hata raekomec sāc ruc bagarehuc juekac. ²² Ŋic sindaŋne e sāqocne-ticnezi wiwitic ecneha ira feme kiekac. ²³ E jahacnao bābātiŋ gie sācne mi baekacte hāmoocmu hācne, ā mutuc matacne juekacte zāŋeruŋko wāc huocmu.

Qāoma ā siochec juju irec uŋdāŋ

6 Motec-mae, go ŋic āgoge bafickehuc tofa-ticne bazucmurā moc mupaŋkemeŋ me? ² Ehame go gahacne mumupaŋ dāŋzi bitiŋ egareha rocguwec me? ³ Motec-mae, go iŋuc wiac moc fua-gareme ŋic ere meo femēŋko ine gahacne sahač ŋezickecmurā kecziŋuc ezemec: Go picpac jaha erao rarā akicguocte numucnezemec. ⁴ Irec go hesacke furic ehuc guŋ mi fozemec. ⁵ Go wipezi eekac iŋuc ehuc bitiŋ heunuckerā wisezemec, erā beczi wosaŋeŋ bapa ŋic honerā qārucnerā wisehuc juju-ticne bāfuaekac irec sāc ezemec.

⁶ Ŋic roroc qaŋqaŋne jaŋe fiu qozazaŋ jaŋere eebapa honerā maŋqārāŋ bāfuazepieŋ. ⁷ Fiu qozazaŋ jaŋe soŋaŋ micne me ŋicwofuŋ me guriŋ bapafāc-jeŋic aricne, ⁸ erā sifu hoemaŋ dameŋte manasuhuc nānā wiac-jeŋic zoaŋ dameŋkoa ro qāzuc eengopieŋ. ⁹ Ŋic roroc qaŋqaŋne e mo dameŋko ojoŋ juju-ticne moc beheocmu? Me wezimucko moc faharerā gie baocmu? ¹⁰ E ziŋuc hācne muekac: “No me zāzāfic qarā guŋ piticne mac fope.” ¹¹ E iŋuc muhuc guŋ fohame roroczi zikaŋic jaŋe iŋucne ututuŋ jaha fisicnerā bawahaocmu.

¹² Ŋic repic qapicne ā sindaŋ hāriŋdaŋne jaŋe gibioc dāŋ muhuc juengopieŋ. ¹³ Ehuc esāic-ŋopaninte zāŋe bazuc eŋareengopieŋ ā kikezi āte ziŋuŋ-ŋopaengopieŋ erā mezi sāsāc eŋareengopieŋ. ¹⁴ Jaŋe iŋuc ehuc hehesic bāfuaniŋte maŋzi dāŋ manasu biric eengopieŋ, ehuc doc bapa gie bahuc juengopieŋ. ¹⁵ Jaŋe iŋuc eengopieŋte sisipiriczi ututuŋ jaha fisi-jarerā bāsirowec-jopame mocwāc mi juniŋmu.

¹⁶⁻¹⁹ Wofuŋ e eebapa 7 kecziŋuc jaŋere maname mamakācne eha rāsi ejareekac:

Pepec zăne fifi,
micbipiczi wokemaŋ dăŋ mumu,
ŋic bahacmăc qăqăhămoc-jopa,
dăŋ repicne manasu biric ee,
wiac hehesicne ezore fâro hata rara,
dăŋgieo domahuc dăŋ muhasickeră burec ee,
eră âgo ŋondenŋko juhuc iiriac â kikisă bâbâfua.

Boe sau gie bapare uŋdăŋ

²⁰ Motec-mae, go mamacgere sâcmutăc dăŋ mana reren ehuc juzemec, eră wăc nengocgezi wiac qazu-garewec irec moc mi nikecguzejec. ²¹ Go dăŋjekic mangao răetec foha paŋzăic jaha bajuzemec. ²² Ehamata hata ira me ira racmură jowa qataŋ egarezejec, ehuc ŋafeo ŋezicguzejec â zoaŋko wăc baficguzejec. ²³ Sâcmutăc dăŋjekiczi lambe igucne tamae-garezejec, â mumutiŋ dăŋjekiczi juju hata biagne irec fuŋne gaza mutăc ezejec. ²⁴ Sasec ŋokac ŋaŋerao qohotazicte me ŋokac găcne ŋaŋere wokemaŋ dăŋzi bădoc-guzacte jahere dăŋzi hăcne aka săcne hegareocmu. ²⁵ Ŋokac hawari-ŋeŋic biagne izi mi woricguzejec, me zăne rărăqăc honecgupie ririfireră mi docke-jarezemec. ²⁶ Ŋic moc e hata ŋokac nănă poroŋ mocjaha maczi furine bazo mură baocmu, măc boe sau gie bapazi ine juju-ticne fărine sipiricke-făreocmu.

²⁷ Go zocmimiŋ hăpohăntec ŋaqige akickeocmu me? ²⁸ Me zoc kine fainao âtehăntec kikege mi zaocmu me? ²⁹ Manakic, ŋic moczi ŋic mocte ŋonăŋhec focmu e irec săc fuacneocmu. Moc e iguc eocmuzi zăic manaocmu hăcne. ³⁰ Ŋic moc e nănăre hămohuc fiuc roocmuo ine ŋic ŋaŋe manacnepie boc mi săqoreocmu. ³¹ Mocjaha, fiuc rohame izia băfuaniŋmuo ine wiac irec furine răeha arec 7 eocte mucneniŋmu, e wiac focnekac săc răe-făreocmu hăcne. ³² Ŋic moc e boe sau gie baekaczi maŋ mamanasu tămiric juhuc jahacne juju sipirickeekac. ³³ Ŋic e qahuc zăne biŋe-ticne bawahapie waha qaqane eră juocmu. ³⁴ Ŋokacte ŋowezi hăcne ŋic e manaŋkehuc okacne bazucneocte zoqac săko ehuc moc mi akickeocmu. ³⁵ Ehamata furine răcnezo mupie qikiŋneocmu, â wiac izi me izi aaric-ticne wăc mi bămăteŋkeocmu.

Boe sau ŋokac ŋaŋe măsî fuŋne fuŋne eengopien

7 Motec-mae, go dăŋ gazaekopac i manasuhuc juzemec, ehuc sâcmutăc dăŋnanere moc mi nikecguzejec. ² Go sâcmutăc dăŋnane mana reren eră juhăc qăhămocmu. Go zăne hăndăŋge soŋaŋkeekic irec săc jaha mu qaqazuc dăŋnane soŋaŋkezemec. ³ No dăŋ gaza qazuc eekopac i dameŋ săc paŋzăic jaha bajuzemec, ehuc mangao qăreŋketec fozejec. ⁴ Go maŋqărănte manatec sengere săc ezejec, â maŋzi wiac mamana tara irec manatec âgo fuŋfunge ezejec. ⁵ Jahe hăcne ŋic găcne ŋaŋere ŋonăŋfăc ŋaŋerao mecne, â eăsăicguhuc wokemaŋ dăŋ egareengopien ŋokac i ŋaŋerao mămăc razicte aka hegareekopirec.

⁶ No dameŋ: mocko ficnaneo ŋehuc qăqătăc katangko zăne fiŋe rawec. ⁷ Eme ŋicmotec socqări mamanasu tămiric ŋaŋere ŋondenŋko motec mutuc matacne moc jume honepo. ⁸ E hata săko fotăcneră hata ŋeŋehasicko boe sau ŋokac moc juwec irapac rară ere ficko fisiwec. ⁹ Eră i hae ŋafeme

dapâc foha iŋuc ewec.

¹⁰ Ehamê ɲokac e mi fickonec waharâ bâfuazejec i! ɲokac e hata ɲokac jaŋere rurufa â eri qoqonaŋ wiac iŋucne rojuwec, ehuc eesâic gie baocte mâsi fuŋne fuŋne ewec. ¹¹ E mimi tâmiric hata sâkoo sisi hâhâŋ faio ifi aifi jaha rac warec ewec. ¹² Ehuc doma qatara rarâ hata ɲeɲehasicko domawec, izi irecne ra hata sâkoo domawec, izi rarâ wiac nareŋ gareŋ eere tomao domawec. ¹³ Iŋuɔ ehuc motec mutucne e honerâ izia hâpo mumuduc ecnerâ sasec zâŋe fihuc dâŋ kecziŋuc âzâcnewec: ¹⁴ “No miŋecgac qowi bâzi rikepacte qowi tiwâne fonarekac. ¹⁵ Irec no fickonec waharâ gore zâŋe fihuc juku bâfuacgukopac hâcne. ¹⁶ Manakic, no Aigita mâreŋkonec fofo qoruc erinehec i biac fofo-naneo rumackepac. ¹⁷ Ehuc siŋsiŋ saŋkarac â zineŋ sâfânâŋ wiac âsu bian i wâc biac râe-fârepac. ¹⁸ Irec go biac waretec waha hâhâpoc erâ fohuc zeri bubian manahuc fohapere hae furezejec. ¹⁹ ɲowe-nanezi zira mi jukac, e zoricko rawec. ²⁰ Ehuc monerŋ bocjaha amecke rawec, irec juku Sonda 2 tarame risieocmû.”

²¹ ɲokac e iŋuc muhuc motec esâickeme wokemaŋ dâŋticnere dockewec. ²² Eme izia bulimakao qa hezuc eniŋte baraengopien, me qowi moczi bitin mi hone tarahuc ututuŋ jaha raŋime kime foha ²³ ɲic jaŋe fisirâ tepe moteczi murupie hâmoekac, irec sâc ehuc ɲokac bâjâpeme ficticnao fepic. E wipezi sisipiric fokac i mi mana tarahuc uficko jowaekac irec sâc jaha ehuc juju-ticne ômaeocmu i mi mana tarawec.

²⁴ Irec motec-mae, go hazec râe-hâmohuc micdâŋ-nane manazemec. ²⁵ Go ɲokac iŋucnezi maŋ bâsifuc egareme hata-ticne moc mi bâjâpezemec. ²⁶ ɲokac e ɲic bocjaha sipiric-jopawec, erâ ɲic guru sâko bâdoc-jopame hâmo-fârembiŋ. Irec go ere ficko fecmuo ine hâmoc haere hatao racmu. Izi hâcne hâmoc haere hata bembegne ekac.

Maŋqârânŋe mu baafec dâŋ

- 8** Maŋqârânzi wirakac,
â mamana tarazi owackerâ dâŋ mukac,
irec hazec râerâ mananiŋ!
- ² E tiki botânko mecne, hata sâko heririŋko mecne,
â hata ɲeɲehasicko mâmâc domahuc iŋuc ekac.
- ³ Erâ hae mendânko â haesac motâcko wâc domahuc
ziŋuc muhuc wirakac hâcne:
- ⁴ “O ɲicbureŋ, no ɲoŋe hâcne wira-ɲarekopac,
â marac fânâŋ-nane i mâreŋ sâc ɲic zenggoma ɲoŋerao fuakac.
- ⁵ Maŋhumuc juŋgopien ɲoŋe mamana bâfuaninŋ,
â ɲic mutucne ɲoŋe maŋfânâŋhec eniŋ.
- ⁶ ɲoŋe dâŋnane bianne i mana maŋ eniŋ,
micnaneonec dâŋ wahaekac i tiŋne sasawa.
- ⁷ No dâŋ muekopac i fârine sasawa,
â burecdâŋ ine qaisockeekopac.
- ⁸ No dâŋ jâmbomac sasawa muekopac,
sioc â mumusifuc dâŋ ine mi eekopac.
- ⁹ ɲic mamana tarahec jaŋe dâŋnane mana tiŋneengopien;
â maŋ mamasuhec jaŋe mana tara-fâreengopien.
- ¹⁰ ɲoŋ siliware manapie omane eha

dânnanere manapie fârine ezejec,
erâ gol qaqacnere wâc manapie wawahane eha
mamana tara irec manapie furi sâko ezejec.

- ¹¹ “Manqârân no qânâ furi sâko jaŋere sâc sirickeekopac,
â wiac furi sâko i me i nohec sâc hehene mi eekac.
- ¹² Manqârân no mamana tara-nanehec,
erâ mamana saric â mumutiŋ i wâc fonareekac.
- ¹³ Ŋic moc e Wofuŋ araŋ bacneocmuŋi hehesic qikiŋneocmu
no irec hâcne sahac fefe â penaroŋ,
eebapa sâqocne â burecdân i râpecke-fâreekopac.
- ¹⁴ No mamana tara â tâpiri-nanehec,
irec dâŋ manasu biric erâ fârine wâc bâfuaekopac.
- ¹⁵ No ŋicwofuŋ jaŋe guriŋ bapa gie baniŋte,
â ŋic fekicne jaŋe sâcmutâc dâŋ bianŋe râeniŋte bafic-
-jopaekopac.
- ¹⁶ Mâreŋte guriŋ bapa ŋic,
gawamaŋ me ŋic zâŋe biŋehec
jaŋe noni hâcne dopec-jopahape
gie-jeŋic baengopien.
- ¹⁷ No manjaun enareengopien
jaŋe manjaun jaha wâc ejareekopac,
â wira basac enareengopienzi bâfuacnuengopien.
- ¹⁸ Norao hâcne mazuc mâriri â zâŋe biŋe,
erâ mumutiŋ â jujuhâmo bâbâfuane fokac.
- ¹⁹ Noraonec wiac ronimŋu i gol ematauckekicne
â siliwa qaqacne irec sâc jâuruocmu.
- ²⁰ No tiŋne jujure hatao raekopac,
ehuc ŋic jaŋere dâŋ mutiŋnehuc mutaraekopac.
- ²¹ Ehuc manjaun enareengopien jaŋe bafic-jopahape
mafa mâriri fua-jarerâ ficjeŋic fusucmaekac.
- ²² “Wofuŋ e wiac sasawa moc mi fuarâ foha
bâbâni no hâcne fuŋkerâ bâfuacnuwec.
- ²³ E mârâc sasac jaha jâmbân
mâreŋ sâko mâreŋ moc mi bâfuahuc
no hâcne râecnuwec.
- ²⁴ Hâwec sâko me opâ zâŋe moc mi fuarâ foha
no hâcne fuapo.
- ²⁵ Tiki kâcŋene â piticne jaŋe
ŋeŋe-jeŋicko moc mi ŋehapie
noni hâcne fuapo.
- ²⁶ Anutuzi mâreŋ me jufu sesuc
me mâreŋ qâhâcne hungaŋne mac moc mi bâfuaha
no hâcne fuarâ jupo.
- ²⁷ No fuarâ juhape Anutuzi sawa qânikiŋ râewec,
â hâwec qaŋeŋne fâretinewec.
- ²⁸ Ehuc faic karorac qaratiewec
â juwic hâwec sâko zâŋene bâmârâŋkewec.
- ²⁹ Erâ no fuarâ juhape jaha mâreŋte hobeteŋne râehuc

hâwec sâko tofo-ticnao foocte mutaracnewec.

³⁰ Ehame no zoagne zoagne Anuture heriringko
zeri faio juhuc bubian băfuacnepe
mana-nareme biankewec.

³¹ IŃuc enareme mârenŃe manape zerine ewec,
â ȃic jaŃere wâc manape biankewec.

³² "Irec ȃicmotecfâc-nane, ȃoȃe dăŃnanere hazec râeniȃ,
erâ dăŃ ȃazaekopac i mana reren ehuc juhâc qăhămonigmu.

³³ DăŃ ȃaza qazuc ekicne i mana hămonȃepieȃ,
erâ maŃqărâŃhec juhuc mi qăsuanȃepieȃ.

³⁴ No ȃic moczi kecȃiguc eocmu ere manape zerine eocmu:
DăŃnanere hazec râeocmu,

me zoagne zoagne ficmotăc-naneo fisiră
motăc râpeo maŃqărâŃ nore woȃec domaocmu.

³⁵ ȃic moc e no băfuacnuocmuzi juju băfuaocmu,
ehame Wofuȃzi manacneme biankeocmu.

³⁶ Me ȃic moc e no qaisocnuocmuzi
hămocte aȃackeocmu hăcne."

MaŃqărâŃhec juju â mutuc matacne juju irec fuȃne

9 MaŃqărâŃ e ficticne baocŃe wătuȃ 7 âkendăȃne-fărewec. ² Erâ tiwă
băzi bămockeocŃe qowi moc qa hezuc ewec â waȃi opă-ticne i wiac
ăsu bianȃhecz i băsifuckewec, erâ wăc tela kasor wiac răe-fărewec. ³ Ehuc
kiȃȃ narufăcne jaȃe haetorȃko domahuc dăŃ kecȃiguc musokahuc
muniȃe sorec-jopawec: ⁴ "ȃic ȃokac mamana tămiric ȃoȃe wefuniȃ!"
Ă ȃic mutuc matacne jaȃe wăc ȃiȃuc jazaekac: ⁵ "ȃoȃe wefură nănă-
-nane â waȃi opă wiac âsu bianȃhecz i băsifuckepac i nă bac eniȃ.
⁶ ȃoȃe ȃic ȃokac mamana tămiric jaȃe behec-jopară maȃzi wiac mamana
tara irec hata băjăpehuc juhâc qăhămonȃepieȃ."

⁷ Go ȃic mu âke sisicne moc mu bătiȃ ecnecmuo ine mimi qaqa faigao
feocmu. Me ȃic hehesicne moc dăŃ mucnecmuo ine eki răsi egarehuc
băȃăicȃuocmu. ⁸ Irec go ȃic mu âke sisicne mu bătiȃ moc mi ecnezemec,
sifu ecnecmuo ine qaisocȃuocmu. ȃic maŃqărâŃhec dăŃ mucnecmuo ine
ăgo egareocmu. ⁹ Go ȃic maŃqărâŃhec dăŃ i me i moc âȃăcnetec
maŃqărâŃ-ticne soka sanar eocmu. Me ȃic tiȃne moc dăŃ i me i âȃăcne
qazuc ecmuo ine mamana-ticne soka ȃedămărec eocmu.

¹⁰ Wofuȃ araȃ babacne izi maŃqărâŃte hata fufuȃkene ekac. Go Tiri rune
mana zakiehuc maȃzi mamana tara băfuacmu. ¹¹ MaŃqărâŃzi jarage
bafehuc juȃe băȃoraocmu. ¹² Manakic, go maŃqărâŃhec juȃmuo ine irec
fărine bianȃe fua-gareocmu, me maŃqărâŃ râpecketec irec okacne ȃăic
busăȃoc fua-gareocmu.

¹³ Wiac moc ȃăȃene mutuc matac e ȃokac mamana tămiriczi mimi
tămiric jaha dăŃmarac sâko eekac ere săc. ¹⁴ E ficticnere motăcko me
haetorȃko ȃeȃeră juekac. ¹⁵ Ehuc ȃic ȃokac hata-ȃeȃic săc rac warec
eengopieȃ jaȃe dăŃ ȃiȃuc muhuc wira hefărec ejareekac: ¹⁶ "ȃic ȃokac
mamana tămiric, ȃoȃe wefuniȃ!" Ă ȃic mutucne jaȃe ȃiȃuc jazaekac:
¹⁷ "Opă fiuc rokiȃne i năpie aȃac ȃizine eekac, â nănă poror fiuc rokiȃne i
wăc năpie aȃac baȃacne jămbăȃ eekac." ¹⁸ ȃic ȃokac eatuc-jopaekac jaȃe,

ira rarâ hâmonanmu i mi mana taraengopien, ehuc mârâc ira rambin jaŋe biac hâmoc haeo humbin, i wâc kâuc baengopien.

Salomore muqâqin dân qâhâckerâ râe-fârekicne

10 Motec moc maŋqârâŋhec juocmu e mamac-ticne bubian qacneocmu; â motec mutucnezi ine nenggoc-ticne zâic busâqoc bâfuacneocmu.

² Wiac sindagne ehuc moneŋ mafa bâbâfua izi sâcne mi bafic-nâpooocmu, bâmec bapa giez i ine hâmockonec batarac-nâpooocmu.

³ Wofuŋ e ŋic tiŋne jaŋe nânâre hâmo sipiric eniŋte mi manasuekac, ehuc ŋic hehesicne jaŋe râsi ejarehuc buchâro-ŋenŋic game wahaekac.

⁴ Ŋic oŋoŋnezi hapetac erâ juocmu, gie zoqachec baocmuzi ine moneŋ mafahec eocmu.

⁵ Ŋic mamanaheczi qa roro damen maickeme nânâ wiac qa roro eocmu, â moc e qa roro damenŋko guŋ focmuzi ine wiac miminehec bâfuaocmu.

⁶ Ŋic biagnere faio wiac biagne jaha feocmu, â ŋic sindagne e maŋticnao zârâ foekac i dâncticnezi tapa baekac.

⁷ Ŋic biagne jaŋe ehâmo-nârehuc jumbinŋte manasuc-jopaengopenenŋ, â ŋic sindagne jaŋere ine biac nîkec-nâpoekac.

⁸ Ŋic mamanahec jaŋe mumutâc dân mana maŋ eengopien, dân racne muengopien jaŋe ine sipirickeniŋmu.

⁹ Ŋic sioc tâmiriczi wama faio juhâc qâhâmoocmu, ŋic siochec ere fuŋne ine biac bataniŋkeniŋmu.

¹⁰ Ŋic moc e bahac hesonkehuc zârâ hâriŋ bâfuaocmu, â moc e wiac mocte maname sâqoreme mufuahuc wamare gie baocmu.

¹¹ Ŋic biagnere dânzi jujure opâ zâŋe tinac eekac, â ŋic sindagne e maŋticnao zârâ foekac i dâncticnezi tapa baekac.

¹² Qaqaisoc eengopien ŋic i jaŋe zika bâfuaengopien, â ŋic maŋjaunhec jaŋe ine ŋic âgofâc-ŋenŋic jaŋere bahac hone qâoma eengopien.

¹³ Ŋic mamanahec jaŋe dân fârine jaha muengopien, ŋic mutuc matacne jaŋe ine bâtiŋ-jopazo.

¹⁴ Ŋic maŋqârâŋhec jaŋe mamana sâko fua-jareocte zoqac sâko eengopien, ŋic mutuc matacne jaŋe ine dân mupie sisipiric fuaekac.

¹⁵ Ŋic mafa sâkohec e moneŋ mafa-ticnezi bafickeekac, â ŋic qarâ suriŋne jaŋe ine hapetac juku sipirickeengopien.

¹⁶ Ŋic biagne e juju-ticnere fârine jujuhâmo bâfuaekac, â ŋic hehesicne ine juju-ticnere fârine sisipiric bâfuaekac.

¹⁷ Ŋic moc e mu bâtiŋ ecnepie mana maŋ erâ sâcne juocmu, â ŋic moc mu bâtiŋ ecnepie qikiŋnerâ hata qâsorieocmu.

¹⁸ Ŋic moc e burecdân muocmuzi ŋic âgofâc-ticne qaisoc-jopaocmu, â moc e gupe micko âkec eocmuzi ine ŋic mutuc matacne erâ juocmu.

¹⁹ Sâqocne bâfuaazo eengopien ŋic i jaŋe dân bocjaha woseengopien, â ŋic maŋqârâŋhec jaŋe ine dân afecne sawa muengopien.

²⁰ Ŋic biagnere dân i siliwa qaqacne irec sâc, â ŋic sindagnere maŋ mamanasu izi ine wiac fâri tâmiric.

²¹ Ŋic biagnere dânzi ŋic ŋokac bocjaha bafic-jopaekac, ŋic mutuc matacne jaŋe ine mutuc-ŋenŋicte erâ hâmoengopien.

²² Wofuŋzi ŋic moc jambuŋkeme wiac fofo dundun focneocmu, ehame ŋic e jahac zoqac ehuc wiac moc zuhuckerâ bâbâfua i sâcne mi eocmu.

²³ Ŋic mutucnezi wiac hehesicne ehuc aŋac manaekac, â ŋic

mamanaheczi ine maŋqârānte maname wiac biagne eekac.

²⁴Ņic tiŋne e wiac irec me irec ecneocmu sâc bâfuaocmu, â ŋic sindaŋne e ine wiac irec me irec hâwickceocmu i hâcne fuacneocmu.

²⁵Ņic sindaŋne jaŋe sisipiricte mârâŋ qicwânzâŋneheczi ficne suēc-jopame siroweengopieŋ, â ŋic sioc tâmiric jaŋe ine dameŋ sâc juhâc qâhâmoengopieŋ.

²⁶Go ŋic oŋŋeŋezi gore gie moc baocte mi mucnezemec, e saŋe me zamaŋ nâpene micsiec-nâŋec ariweekac irec sâc, me zoczi hosâc-nâpome zâŋe-nâŋeczi hâhâtaweekac iŋucne.

²⁷Go Wofuŋ araŋ bacnehuc dameŋ zora jufecmu, ŋic sindaŋne jaŋe ine dameŋ-ŋeŋic mi maickeha biac hâmoengopieŋ.

²⁸Ņic tiŋne jaŋe wiac biagnere mamanaŋ juhuc bubiaŋ faio juengopieŋ, â ŋic sindaŋne jaŋe ine wiac irec me irec mamanaŋ sawa juengopieŋ.

²⁹Wofuŋ e ŋic bahacmâc jaŋe ŋezic-jopaekac â ŋic hehesicne jaŋe ine bâsirowec-jopaekac.

³⁰E ŋic tiŋne jaŋe juju-ŋeŋickonec batac bawarec mi ejareocmu, ŋic sindaŋne jaŋe ine mârēŋ-ŋeŋicko mi ŋehâmoniŋmu.

³¹Ņic tiŋne jaŋere mickonec maŋqârâŋ dâŋ sawa wahaekac, ŋic sindaŋne jaŋe namaŋ-ŋeŋic ine hetâcne behec ezo.

³²Ņic tiŋne jaŋe dâŋ biagne muengopieŋ, â ŋic sindaŋne jaŋe ine dâŋ simbiŋne muengopieŋ.

11 Ņemâc bâbâfuare sâc sâcti qâtiri bajuengopieŋ ŋic i jaŋe Wofuŋzi qaisoc-jopaekac, â ŋemâc bâbâfuare sâc sâckoa bajuengopieŋ jaŋere ine maname sâckeekac.

²Ņic sahaŋ cefe juengopieŋ jaŋe mimi qaqa ejarehuc bawahac-jopaekac, â ŋic maŋhuhuŋ juengopieŋ jaŋe ine maŋqârâŋ bâfua-jareekac.

³Ņic biagne jaŋe siocmâc juju-ŋeŋiczi jowa qataŋ ejareekac, ŋic otec keŋŋoŋne jaŋe ine eeatuc-ŋeŋiczi bâsirowec-jopaekac.

⁴Moneŋ mafazi dameŋ sâkoo sâcne mi ŋezic-nâpoocmu, siocmâc juju-nâŋeczi ine hâmockonec batarac-nâpoocmu.

⁵Nâŋâc siocmâc juŋaŋmuo ine juju-nâŋec fâretij jaha foocmu, ŋic sindaŋne jaŋe ine jaŋacne jujuzi bawahac-jopaocmu.

⁶Ņic siocmâc jaŋe tiŋne juju-ŋeŋiczi ŋezic-jopaekac, â doc bapa ŋic jaŋe ine eeatuc-ŋeŋiczi bitij ejareha ira razipie kicjopaekac.

⁷Ņic sindaŋne jaŋe hâmoŋapie woworic-ŋeŋiczi wâc omaeocmu, moneŋ mafao roweckehuc juju izi fâri tâmiric eocmu hâcne.

⁸Ņic tiŋne jaŋe zârâ hârĩŋkonec batarac-jopazo, ehuc jaŋere okacne ŋic sindaŋne zârâ hârĩŋko râec-jopazo.

⁹Ņic hehesicne jaŋere dâŋzi ŋic âŋofâc-ŋeŋic sipiric-jopaekac, â ŋic tiŋne jaŋere maŋqârâŋ dâŋzi ine bafic-jopaekac.

¹⁰Ņic tiŋne jaŋe hae maŋnao juhâc qâhâmoŋapie zeri bubiaŋ fuarâ foekac, ehame ŋic sindaŋne jaŋe hâmoŋapie zeri ehuc kiwac qawac eengopieŋ.

¹¹Hae moc irec maŋnao ŋic jaŋe tiŋne juŋapie hae irec zâŋe biŋe faharehuc foekac, ŋic sindaŋne jaŋere dâŋzi ine hae bâsâqoreekac.

¹²Ņic maŋ mamanaŋsâ tâmiriczi ŋic âŋo-ticne manacneme wawahane eha râpedâŋ ecneekac, â ŋic mamana taraheczi ine dâŋemâc juekac.

¹³Gupe baekac ŋic e dâŋ moc âzâcnehuc mic muac ecneengopeneŋ i

kosa mutaniŋkeekac, â ɲic aki metânezi ine maŋticnao râeme foekac.

¹⁴ Ɖicguru moc jaŋe guriŋ bapa tâmiric junigmuo ine siŋsaŋ qahuc sipiricke-fâreniŋmu, mumutâc ɲic bocjaha jujarepie ine sâcne juniŋmu.

¹⁵ Ɖic furune jaŋe tofa-jeŋic bazunânte numu-nârepie bafic-jopahuc busâqoc bâfuanzipenŋe biac mi mupaŋkenzepeneŋ, irec moc e wiac iŋucnere mumupaŋ dâŋ mi muocmuzi sâcne juocmu.

¹⁶ Ɖokac biannere manapene fefene eekac, â ɲokac iriŋ biriŋnere ine manapene wawahane eekac. Ɖic otec qeticnezi moneŋ mafa moc mi bâfuaocmu, ɲic zoqachezî ine mafa mâririhec eocmu.

¹⁷ Ɖic maŋjaugheczi ɲic gâcne bafic-jopahuc e jahacne sahaç bafickeocmu, â moc e ine ɲic âgofâcne bâzâic-jopahuc e jahacne sahaç bâzâickeocmu.

¹⁸ Ɖic sindaŋne jaŋe wiac fârîne moc mi hureengopieŋ, â wiac tiŋne ebac eengopieŋ jaŋe ine irec fârîne biannere jaha bâfuaengopieŋ.

¹⁹ Ɖic moc e wiac tiŋne jaha ebac eocîe sanaŋkeocmu e juhâm'oocmu, â moc e sâqocne bâfuaocîe zoqac eocmu eki ine hâmo-jâmbâŋkeocmu.

²⁰ Wofuŋ e ɲic maŋzoc-jeŋichec jaŋe qaisoc-jopaekac, â maŋ qaqacne juengopieŋ jaŋere ine maname biannkeekac.

²¹ Go ziŋuc manapaŋkec: Ɖic hehesicne jaŋe okacne fua-jareocmu, ɲic tiŋne â qâricfâc-jeŋic jaŋe ine juhâc qâhâmoniŋmu.

²² Ɖokac sahaç hawari biannzi mimi jaŋgeŋ juekac e, golzi finzuŋ bakicne i bec masunao râepene foipieha sifu mâreŋ suahuc sohoŋ ruaekac irec sâc eekac.

²³ Ɖic tiŋnere woworic gie i raku bibiaŋkoa fisiocmu, ɲic sindaŋnere wosaŋge gie raku kimben sanaŋ bâfuaocmu.

²⁴ Ɖic gâcne jaŋe moneŋ-jeŋic mi sakarehuc boki bapie moneŋ mafa sifu zuhuckerâ fua-jareekac, â ɲic gâcne jaŋe ine sakarehuc sifu kitac qatac erâ juengopieŋ.

²⁵ Ɖic moc e wiac-ticne buafec jaha qikiŋneme sifu fofo dunduŋ fuarâ focneocmu, â ɲic moc e ɲic âgofâcne bafic-jopame jaŋe wâc iŋuc jaha bafickeniŋmu.

²⁶ Ɖic moc e padi jacgoŋ-ticne furi fecicne roocîe sakareme sâwec-keniŋmu, â moc e ine furi wahakicne i hone-bipiehuc sifu furi bajareme mumbiaŋkeniŋmu.

²⁷ Moc e wiac biannere gie baocîe henziriŋneocmu ere manapie biannkeocmu, â moc e gie hehesicne baocmu ere faio ine hehesic jaha feocmu.

²⁸ Moneŋ mafa-jeŋicko roweckeniŋmu ɲic i jaŋe jâcrehac mârâŋkerâ wahaekac irec sâc waha jopaocmu, â ɲic tiŋne jaŋe ine jâcrehac fie ruruckeekac irec sâc eniŋmu.

²⁹ Ɖic moc e wiacfâcne zârâ hâriŋ bâfua-jareocmu e wiac biannere moc mi bâfuaocmu, â ɲic mutuc matacne jaŋe ɲic maŋqârâŋhec jaŋere kiŋaŋ qaqa erâ juniŋmu.

³⁰ Ɖic moc e tiŋne juocmuzi irec fârîne juju hotâckeocmu, â ɲic moc e zâzâicne juocmuzi ine juju-ticne sipirickeocmu.

³¹ Ɖic tiŋne jaŋe juju-jeŋicîe fârîne mâreŋko ronigmuo ine ɲic sindaŋne â hehesicne jaŋe juju-jeŋicîe fârîne wâc rojâmbâŋkeniŋmu.

- 12 Țic moc e mamana tarahec juocmuzi mu bâtiȚ ecnepie maname biankeocmu, â Țic mutuc matacnezi ine mu bâtiȚ qikigheocmu.
2 WofuȚ e gie bianne hone aȚac ejareekac, â Țic wiac hehesicne mana biric eengopieȚ jage ine mana gâpâre-jareekac.
3 Țic moc e wiac sindagne eocmuzi sâcne qiq herâ mi domaocmu, Țic tiȚne jage ine tie farane mi eniȚmu.
4 ȚonâȚ biannezi Țowe-ticnere eridu tinac eekac, â Țokac moc e Țowe-ticne mimi qaqa ecneocmuzi ine, umbenȚi Țic siec-ticne nâekac irec sâc eocmu.
5 Țic tiȚne jage dâȚ bianne maȚkerâ juengopieȚ, Țic sindagne jage ine eeatuc dâȚ sawa nâzâengopieȚ.
6 Țic sindagne jaȚere dâȚ izi zika iȚucne Țic bâzâic-jopaekac, â Țic tiȚne jaȚere dâȚzi ine Țic zâic busâqoc faio juhapie bafic-jopaekac.
7 Țic sindagne jage waha jopame omaeniȚmu, â Țic tiȚne jage ine mimiȚzi qâric jufehuc juniȚmu.
8 ȚoȚe mamanahec juȚie Țic jage mumbiaȚ-ȚopanȚmu, â mutuc matacne juhapie ine mana wahac-ȚopanȚmu.
9 Țic moc e maȚhuhuȚ juhuc nânâre hâmozacte gie bame biankeocmu, â Țic moc e ine zâȚe biȚe-ticne sawa feocte manasuhuc oȚoȚ juocmuzi nânâre hâmoocmu.
10 Țic bianne jage qowifâc-jenȚic aijakic jaha hone maiȚ ejareniȚmu, â Țic sindagne jage ine hone qâoma ejareniȚmu.
11 Țic moc e zoqachec jaha hesarac gie baocmuzi nânâ sâcne bâfuaocmu, â Țic moc e mutuc erâ qâoma juocmuzi ine roroc qanqagne juocmu.
12 Țic sindagne jage wiac hehesicne sawa eniȚte maȚkeengopieȚ, â Țic tiȚne jage ine sananȚerâ domaniȚte manasuengopieȚ.
13 Țic sindagne e jahacne dâȚzi bitiȚ ecneha razime kiocmu, â Țic siocmâc eki ine zârâ hârȚko mi feocmu.
14 Țic moc e miczi dâȚ muekac irec sâcko wiac roekac, â moc e mezi gie baekac irec sâc jaha wiac roekac.
15 Țic mutuc matacne e jahacne maname sâckeekac, â Țic maȚqârânȚ-heczȚ ine Țic gâcne jaȚere dâȚ manaekac.
16 Țic mutucnezi maȚzoc-ticnere fuȚne onzȚoȚ jaha bataniȚkeekac, Țic mamanahec musoriȚkepie ine mamana sâqoc biac mi bâfuaekac.
17 Țic sioc tâmiriczi dâȚ fârȚine sawa muekac, â burecȚiczi ine eeatuc dâȚ muekac.
18 Țic maȚzochec ere dâȚzi zika iȚucne kicnâpoekac, â Țic maȚqârânȚhec ere dâȚzi ine âȚo bacnâpoekac.
19 Jâmbomac dâȚzi forahuc juocmu sananȚ, â burecdâȚzi ine biac omaeocmu.
20 Wiac hehesicne mana biric eengopieȚ jaȚere maȚko eeatuc foekac, â wiac bianne mana biric eengopieȚ jage ine bubiȚanȚ bâfuaengopieȚ.
21 Țic tiȚne jage wiac hâhâwicne mi fua-jareekac, â Țic sindagne jage ine zârâ zâpâ faio boc feengopieȚ.
22 WofuȚ e burecȚic jaȚere maname mamakâcne eekac, â Țic sioc tâmiric jaȚere ine maname biankeekac.
23 Țic maȚqârânȚhec jage mamana-jenȚic boc mi mutaniȚkeengopieȚ, â Țic mutucne jage ine mutuc-jenȚicte fuȚne musokaengopieȚ.

²⁴Ńic moc e gie zoqachec baocmuzi zâŃe biŃehec erâ guriŃ bapa Ńic juocmu, â moc e ine ojon juocmuzi kiŃaŃ gie sawa bahuc juocmu.

²⁵Mana mezac ee izi Ńic maŃnâŃec bawahaekac, â âgodâŃzi ine bubiŃ bâfua-nâreekac.

²⁶Ńic tiŃne jaŃe sâqocne wisecneengopieŃ, â Ńic sindaŃne jaŃe ine hata hehesicnao rahuc qâsorieengopieŃ.

²⁷Ńic ojognezi wiac irec me irec ecneme sâcne mi bâfuaocmu, â Ńic moczi gie zoqachec baocmu e ine wiac fofo dundaŃ fuaâ focneocmu.

²⁸Ńic moc e siocmâc juocmuzi jujure hatao raocmu, â moc e ine sindaŃ hârindaŃ eocmuzi hâmocte hatao raocmu.

13 Motec maŃqârâŃhec e mamacnezi mu bâtiŃ ecneme dâŃticne manaocmu, â motec zaubacnezi ine dâŃticnere takickeme qikiŃ-neocmu.

²Ńic biane jaŃe dâŃjeŃicte fârine biane jaha roengopieŃ, â Ńic eeatucne jaŃe ine bâbâzâic gie baniŃte boc ejareekac.

³Ńic moc e micticne soŃaŃkeocmuzi juu-ticne Ńezickeocmu, â moc e ine manabâc mi ehuc dâŃ kosa muocmuzi juu-ticne sipirickeocmu.

⁴Ńic ojognezi wiac irec me irec boc ecneha sifu mi bâfuaocmu, â Ńic moc e gie zoqachec baocmuzi ine wiac irec me irec ecneocmu sâc bâfuaocmu.

⁵Ńic siocmâc jaŃe burecdâŃ qaisockeengopieŃ, â Ńic sindaŃne jaŃe wiac mu bac epie mimiŃehec â mamakâcne eekac.

⁶TiŃne juuŃi Ńic bahacmâc Ńezic-jopaekac, sâqocnezi ine Ńic sindaŃne bawahac-jopaekac.

⁷Ńic hapetac gâcne jaŃe Ńic moner mafa sâkohec jaŃere hawari eengopieŃ, â Ńic mafa mâririhec gâcne jaŃe wiac-jeŃic foipieha sifu Ńic hapetac jaŃere hawari juengopieŃ.

⁸Ńic moner mafa sâkoheczi juu-ticne Ńezickeocme afeckerâ kiwiric-ticne râeocmu, â Ńic hapetaczi ine iŃuc eocme eipieocmu.

⁹Ńic tiŃne jaŃe lambe tatamac sâko iŃucne, â Ńic sindaŃne jaŃe ine lambe tatamac gâkowaekac irec sâc.

¹⁰Ńic zaubacne jaŃe bahac fuŃne fuŃne bâfuaengopieŃ, â Ńic maŃqârâŃhec jaŃe ine Ńic âgofâc-jeŃic dâŃko bafic-jopaniŃte ejareekac.

¹¹Gie fâro faio sawa bahuc moner mafa bâfuaengopeneŃ i biac mocwâc omaeekac, â gie sâko aijkac jaha bahuc bâfuananŃmuo ine zuhuckerâ fua-nâreekac.

¹²Mamanac juu-nâŃeczi fârimâc eme maŃnâŃec wahaocmu, â wiac mocte enâreha fârine fuame mamana-nâŃeczi soka Ńedâmârec eocmu.

¹³Ńic moc e Anuture dâŃ fâri hândaŃne qâsuaocmuzi okacne roocmu, â moc e Anuture sâcmutâc dâŃ araŃ bacneocmuzi ine sâcne juocmu.

¹⁴Ńic maŃqârâŃhec jaŃere mu qaqazuc dâŃ izi jujure opâ zâŃe iŃucne, dâŃ izi hâcne hâmocte biŃiŃko fenziŃeŃte hecke-nâreekac.

¹⁵Ńic mamanahec jaŃere manapene fefene eekac, doc bapa Ńic jaŃe ine hâmoc sanâŃte hatao raengopieŃ.

¹⁶Ńic maŃqârâŃheczi gie i me i moc baocme qanaŃ mamanasu gie baocmu, â Ńic mutuc matacnezi ine iŃuc moc mi ehuc mutuc-ticnere fuŃne bataniŃkeocmu.

¹⁷BiŃe mumu Ńic hehesicnezi wiac hâhâwicne bâfuaekac, â kiŃaŃŃic

biagnezi ine wamadân bafisie kac.

¹⁸ Njic moc e giedân biagne qikiñneocmuzi njic hapetac â wawahane eocmu, â moc e mu bâtiñ dân mana rereñ eme ine ere manapene fefene eocmu.

¹⁹ Wiac irec me irec aḡac-nâpome fârine bâfuarâ bubiañ manaeng-gopeneg, njic mutucne jañe ine wiac hehesicne râpeckeninḡe takic-jopaekac.

²⁰ Njic moc e njic mañqârâñhec qâtec-joparâ juhuc mañqârâñhec jaha eocmu, â njic mutuc matacne âḡo ejarehuc ine sipirickeocmu.

²¹ Sâqocne bapa jañe okacne rorozi kikeo kikeo ejareekac, â njic tiñne jañe ine katucne jujuhâmo roengopieñ.

²² Njic biagnere moneg mafa izi naru motec ḡosafâc-ticne jañere biḡe eocmu, â sâqocne bapa jañere moneg mafazi ine njic tiñne jañere biḡe eocmu.

²³ Njic hapetac jañere nânâ wiac i mâreñ furunao bocjaha fuazac, mâc njic hehesicne jañe mâreñ irec aka hejarembiñ.

²⁴ Go ḡokâḡe qaisockehuc qa bâtiñ mi ecnecmu, mañzi jañgkehuc ine qa bâtiñ sâcne ecnecmu.

²⁵ Njic tiñne jañe nânâ wiac moc mi basaengopieñ, â njic sindaḡne jañe ine nânâ âmbâñ nâipiehuc dameg sâc nânâre hâmoengopieñ.

14 Njokac mañqârâñhec jañe ficnâñec ba eric eengopieñ, â mutuc matacne jañe ine hetâtiengopieñ.

² Njic moc e siocdân qikiñnehuc Wofuñ arañ bacneocmu, â moc e siocdân bajuhuc Wofuñ qaisockeocmu.

³ Njic mutuc matacne moc e jahacne maname feha mujañ bocjaha woseocmu, â njic mañqârâñhec ere dânzi ine jahacne ḡezickeocmu.

⁴ Bulimakao jañe bafic-nâpohuc mâreñ mi bâfâuckeniñmuo ine padi jacḡoñ afecne sawa fua-nâreocmu, jañe ḡie bafic-nâpopie ine bocjaha fua-nâreocmu.

⁵ Mumutaniñ njic siocmâc eki dân fârine sawa muekac, â siochec eki ine burecdân sasawa muekac.

⁶ Njic âke sisicnezi mañqârâñhec moc mi eocmu, njic mamanaheczi ine afeckerâ mamana tara bâfuaocmu.

⁷ Go njic mutuc matacne jañehec mi juzemec, jañe mamana biagne i me i moc sâcne mi qazu-gareniñmu.

⁸ Njic mamanahec jañe hata-jenḡic fâreteñ jaha rahuc mañqârâñ-jenḡic bataniñkeengopieñ, â njic mutuc matacne jañe ine mamana mi fojareha mutuc erâ muengopieñ: Nâñe mamanahec.

⁹ Njic mutuc matacne jañe manabâc mi ehuc sâqocne bâfuaengopieñ, â njic biagne jañe ine sâqocne-jenḡic tâmireocte ejareekac.

¹⁰ Mañnâñecko bubiañ me busâqoc fuaekac i njic moczi honerâ baḡabafic-nâpone mi eekac.

¹¹ Njic sindaḡnere ficzi tâtiehame njic tiñnere fic i sananḡerâ ḡeocmu.

¹² Njic nâñac hata moc honerâ biagne muhapene sifu hata izi raku hâmoc haeo mecne fisikac.

¹³ Njic moc e busâqocko juipiehuc sifu mu ḡâḡâwizi busâqoc-ticne tapa baocmu. Dameñ ḡâcnao bubiañ tarame busâqoc fuaekac.

¹⁴ Njic sâqocne moc e eebapa-ticnere sâcko okacne roocmu, â njic biagne moc e wâc iñuc jaha eebapa-ticnere sâcko furine roocmu.

¹⁵ Ɖic mutuc matacnezi dâŋ sasawa irec maname fârine eekac, â Ɖic mamanaheczi ine hata-ticne hone tarahuc raekac.

¹⁶ Ɖic mamanaheczi bahac wiac bâfuazacte aimuŋ jaha juekac, â Ɖic mutuc matacnezi ine maŋne bâruŋkeme wiac manabâc tâmiric eekac.

¹⁷ Ɖic maŋzoc-ticneheczi wiac mutucne eekac, â Ɖic maŋuruchec eki ine wama ruaine juekac.

¹⁸ Ɖic mamana tâmiric jaŋe mutuc-jeŋicte fârine mutuc jaha roengopieŋ, â Ɖic mamana saric jaŋe ine mamana tara ro rauc eengopieŋ.

¹⁹ Ɖic sâqocne jaŋe Ɖic bianne jaŋere maio dapenzepieŋ, â Ɖic sindaŋne jaŋe Ɖic tiŋne jaŋere motâcko rumerâ domanzeŋieŋ.

²⁰ Ɖic hapetac jaŋere takic-nâpome âgo boc mi ejareengopeneŋ, â Ɖic moneŋ mafa sâkohec jaŋere ine boc aŋac-nâpome âgo bacjopaengopeneŋ.

²¹ Ɖic moc e Ɖic âgofâc-ticne qaisoc-jopaocmuzi kiŋ hureocmu, â moc e Ɖic hapetac ehâmo-jareocmuzi ine zeri bubiaŋ bâfuaocmu.

²² Wiac sâqocne manasu biric eengopieŋ jaŋe hehesic bâfuaengopieŋ, â wiac biaŋnere gie baengopieŋ jaŋe ine Ɖic âgofâc-jeŋic jaŋe mana-jarepie fefene eha jaŋerao roweckeengopieŋ.

²³ Go gie zoqachec bahuc jujugere Ɖesiŋ sâcne bâfuacmu, ojoŋ juhuc dâŋgie sawa bahuc jucmuo ine Ɖesiŋ basarâ Ɖesawa ecmu.

²⁴ Maŋqârâŋhec juju izi Ɖic mamana saric jaŋere eri hendiŋ ekac, â mutuczi ine Ɖic mamana tâmiric jaŋere qâ zere ekac.

²⁵ Ɖic moc e dâŋgieo dâŋ fâri qizecne mutaniŋkeocmuzi Ɖic âgofâc-ticne jaŋere juju Ɖezickeocmu, â moc e ine burecdâŋ muocmuzi Ɖic âgofâc-ticne doc bacjopaocmu.

²⁶ Ɖic moc e Wofuŋ araŋ bacneocmuzi erao rowecke sanaŋkeocmu, e iŋuc ehuc naru motecfâc-ticne jaŋere qânâuŋ eocmu.

²⁷ Wofuŋ araŋ babacne izi jujure opâ zâŋe ekac, moc e opâ i nâhuc hâmoc getâckeocmu.

²⁸ Ɖicwofuŋ moc e kikefuŋfâc-ticne guru sâko jucnepie zâŋe biŋe sâkohec eocmu, â kikefuŋfâc-ticne jaŋe tâmiric ine Ɖic omane tinac eocmu.

²⁹ Ɖic moc e buuruchec juocmuzi mamana-ticnere fuŋne bataniŋkeocmu, â moc e maŋzoc-ticnehec juocmuzi ine mutuc-ticnere fuŋne bataniŋkeocmu.

³⁰ Ɖic moc e wama ruaine juhuc sahac-ticne gume jowac eocmu, â moc e maŋzârâ-ticnehec juocmuzi ine siec bibiricko wicsaŋaŋ fuaekac irec sâc eocmu.

³¹ Ɖic moc e hapetac jaŋe bâzâic-jopahuc bâbâfua-ticne wâwânâŋ ecneocmu, â moc e qarâ suriŋne jaŋe ehâmo-jarehuc bâbâfua-ticne araŋ bacneocmu.

³² Ɖic sindaŋne e eebapa-ticnezi bawahaekac, â Ɖic bianne e ine siocmâc juju-ticnezi Ɖejezic-ticne eekac.

³³ Maŋqârânzi Ɖic mamanahec jaŋere maŋko Ɖeŋe juju eekac, â Ɖic mutuc matacne jaŋere maŋko ine maŋqârân basaengopeneŋ.

³⁴ Tiŋe jujuzi Ɖic zâŋe biŋe-jeŋic bafahareekac, â eebapa sâqocnezi ine mimi busâqoc bâfua-jareekac.

³⁵ Ɖicwofuŋ jaŋe kiŋaŋŋicfâc-jeŋic maŋqârâŋhec jaŋere manapie biaŋkeekac, â maizi qambaraŋ ejareengopieŋ jaŋe ine bâtiŋ-jopaengopieŋ.

15 Dân okacne urucnezi aaric bawahaekac, â dân fâfâ:neheczi ine manzoc bâfuaekac.

² Ƴic manqârâŋhec ere mickonec mamana dân biagne sawa wahaekac, â Ƴic mutuc matacne eki ine mutucdân sawa muekac.

³ Wofuŋ e mâreŋ ira me ira wiac fuaekac sâc hone manac efâreekac, ehuc wiac biagne me sâqocne ebac ehapene hone jâjâpec-nâpoekac.

⁴ Dân biagnezi juju bâfua-nâreekac, â dân gâgâpâcnezi ine mannâŋec bâsâqoreekac.

⁵ Motec mutucnezi mamac-ticnere mubâtij dân qaisockeekac, â mana man eekaczi ine manqârâŋhec eekac.

⁶ Ƴic tiŋne jaŋe moner mafa qâfoŋne fojareekac, â Ƴic sindaŋne jaŋere huhure wiac ine sifuckeekac.

⁷ Ƴic mutucne jaŋe mâcne, manqârâŋhec jaŋe mamana dân musaweer-gopien.

⁸ Ƴic siocmâc jaŋe Wofuŋ numucnepie maname biagneekac, â Ƴic sindaŋne jaŋe taha bâzi rikecnepie ine maname mamakâcne eekac.

⁹ Wofuŋ e Ƴic sindaŋ hârindaŋne jaŋere eebapa honeme gâgâpâcne eekac, â wiac tiŋne ebac eengopien jaŋe ine manzi zâfic-jopaekac.

¹⁰ Moc e wiac hehesicne ebac eocmu ere faio okacne hâhâwicne feocmu, ehame bâbâtij qikiŋnehuc hâmoocmu.

¹¹ Hâmoc haere fuŋne Wofuŋte maio tâtâc fohame ine wemocko Ƴiczi manŋicnere fuŋne moc Wofuŋte maio sâcne hesogkeocmu.

¹² Ƴic mu âke sisicnezi bâbâtijte takickeekac, â Ƴic manqârâŋhec jaŋe dânzi bafickenijte wâc mi ecneekac.

¹³ Ƴic moc e bubiaŋ maname zâŋe maine fie ruruckeocmu, â moc e busâqoc maname ine zâŋe maine ki humimic eocmu.

¹⁴ Ƴic mamanaheczi mamana gie zuhuckerâ baocte ecneekac, â Ƴic mutuc matacnezi ine mutucdân sawa muhuc juocte ecneekac.

¹⁵ Ƴic waha qaqane jaŋere juju i biagne aricne, â juhâc qâhâmoengopien jaŋe ine juju-jeŋicte manapie zerine eekac.

¹⁶ Hapetac juhuc Wofuŋ araŋ babacne irec manapene fefene ezejec, â moner mafahec zârâ zâpâ faio juju irec ine manapene wawahane ezejec.

¹⁷ Manjaun enârehuc nânâ monzaŋ wiac sawa gumec-nâpopie sifu manapene fefene ezejec, â qaisoc-nâpohuc qowi biuc wokemaŋ sâkohec nârepie manapene wawahane ezejec.

¹⁸ Ƴic manzocheczzi zikadân bâfuaekac, â Ƴic buurucheczzi ine wamadân bâfuaekac.

¹⁹ Ƴic moc e ojon juocmuzi damer sâc ŋemâc bâfuaocmu, â moc e siocmâc juocmuzi ine zâic busâqoc tâmiric juocmu.

²⁰ Motec manqârâŋheczi mamac-ticne bubiaŋ qacneocmu, â motec mutucnezi ine nengoc-ticne qaisockeocmu.

²¹ Ƴic mutuc matacne jaŋe mutuc-jeŋicte manapie bubiaŋnehec eekac, â Ƴic manqârâŋhec jaŋe ine wiac ebac epie tiŋke biaŋ efâreekac.

²² Ƴic âgofâcge jaŋe baficguhapie dânwiacge mu biric etec fârinehec eocmu, â i tâmiric ine fârimâc eocmu.

²³ Ƴic gâcne jaŋe dân munijte eipiehapie damer ijaha Ƴic moczi dân fârine jazame manapie bubiaŋnehec eocmu.

²⁴ Ƴic manqârâŋheczi hâmoc haere hatao mâcne, jujure hatao raekac.

²⁵ Wofuŋzi Ƴic pepece penaroŋhec jaŋere fic hae hetâc qâtâtieekac, â hozec jaŋere wâcwiac ine ŋezickehuc akickeekac.

²⁶ Wofuŋ e ɲic sindaŋne maŋ mamanaŋ-jeŋicte maname wiac mamakâcne eekac, â ɲic maŋqârâŋhec jaŋere dâŋte ine maname aŋac baŋacne eekac.

²⁷ Ɔic moc e eeatuc ehuc moneŋ mafa hureocmuzi wiacfâcne ɲemâc bâfua-jâreocmu, â moc e bâbâmiriŋ mi roocmuzi ine damenŋ zora juhâc qâhâmoocmu.

²⁸ Ɔic biaŋne jaŋe dân okacne bâtikieninŋte mana tara-hâmorâ bâtikieenŋ-gopienŋ, â ɲic sindaŋne jaŋe ine dân manabâc tâmiric kosa mupie sâqoreekac.

²⁹ Wofuŋ e ɲic tiŋne jaŋere nunumu manaekac, â ɲic sindaŋne jaŋere ine sunŋinŋkeekac.

³⁰ Ɔic zâŋe mai-jeŋic fie ruruckeme honerâ zeri eengoponenŋ, â bigedân biaŋne moc manarâ maŋnâŋec qacfiric eekac.

³¹ Ɔic moc e mubâtiŋ dâŋte hazec râerâ mana maŋ eocmuzi ɲic maŋqârâŋhec jaŋere ɲondenŋko sâcne juocmu.

³² Ɔic moc e mu qaŋazuc dân qikiŋneocmuzi e jahacne juju qaisockeocmu, â ɲic moc e mubâtiŋ dân mana maŋ eocmuzi ine maŋqârâŋ fehuc bâfuaocmu.

³³ Wofuŋ araŋ bacnehuc juju izi maŋqârâŋte mamana gie fârine êkac. Ɔoŋe zâŋe biŋehac ezo murâ qanaŋ maŋhuhunŋ junzepienŋ.

16 Ɔic nâŋac wiac irec me irec dân mu biric ezo murâ enaŋmu, ehame irec dân mumutara ine Wofuŋzi eocmu.

² Ɔic nâŋac wiac ebac ehuc manapene tiŋke biaŋ eekac, mâc fuŋne weninŋucte eengoponenŋ i ine Wofuŋzi buc manaekac.

³ Go gie moc bâzo murâ Wofuŋzi jambuŋke-gareocte numucnehuc batec fârinehec eocmu.

⁴ Wofuŋ e wiac sasawa fuŋnehec bâfuac-jopa-fârewec, ehuc ɲic sindaŋne jaŋe ine sisipiricte biŋe râec-jopawec.

⁵ Wofuŋ e ɲic pepecc penaronŋhec jaŋere maname mamakâcne eekac, irec jaŋe okacne rojâmbâŋkeniŋmu.

⁶ Go Anutu manasiŋkehuc erao qohotatec sâqocnege bâtâmiereocmu, â Wofuŋ araŋ bacnehuc jutecc wiacc hâhâwicne moc mi fua-gareocmu.

⁷ Nâŋac Wofuŋzi juju bapa-nâŋec honeme biaŋkeha râsifâc-nâŋec âgo ejarepene jaŋe âgo jaha enâreniŋmu.

⁸ Nâŋac siocmâc juhapene wiacc afecne sawa fua-nâreme manapene mi sâqorezejec, â eeatuc ehuc moneŋ mafa boŋjaha bâfuananŋmuo ine sâqoreocmu.

⁹ Maŋnâŋeczi juju hata-nâŋecte dân manasu biric eekac, ehame Wofuŋzi ine hata fâretinŋ jaha nâzâ nâwotuc eekac.

¹⁰ Ɔicwofuŋ e Anuturre micte dân muekac, irec e moc mi musifuckehuc dân fârine sawa muekac.

¹¹ Wofuŋzi ɲemâc bâbâfuare sâc â sâcmeda wiacc i sâckoa fofâreocte muekac, wiacc sasawa i eki hâcne bâfua-fârewec.

¹² Hehesic bâbâfua izi ɲicwofuŋ jaŋere maio mamakâcne eha tiŋne jujuzi eri ɲeŋe-jeŋicte hobetenŋne eekac.

¹³ Ɔicwofuŋ e dân fâri hândâŋne manaocce ecneekac, irec dân fârine muninŋmu ɲic i jaŋe hâcne âgo ejareocmu.

¹⁴ Ɔicwofuŋ e maŋzoc-ticne fuame ɲic moc qâhâmozacte ɲic maŋqâ-

râghec jaje mu bâmăteŢ ecneengopieŢ.

¹⁵ ŢicwofuŢ e zăŢe mai-ticne fie ruruckeme honepene âgo hawari eekac, ehame zoaŢ damenŢko hoezi măreŢ băgunuckeekac irec sâc enăreekac.

¹⁶ NăŢăc gol me siliwa babaju irec manapene wawahane eha maŢqărăŢ â mamanahec juju irec ine manapene fefene ezejec.

¹⁷ Ţic biăŢne jaje sisipiricte hata genŢeengopieŢ, irec ŢoŢe hata-ŢenŢic hone-hâmohuc ranŢepieŢ; ŢoŢe iŢuc ehuc juju-ŢenŢic ŢezickeniŢmu.

¹⁸ Sahac fefezi sisipiricte hata baekac, â pepec penaronŢi ine sâc lŢaha ehuc bawahac-năpoekac.

¹⁹ Ţic hapetac â maŢhuhuŢ juengopieŢ jajehec juju irec manapene fefene ezejec, â Ţic pepec penaronŢ eengopieŢ jajehec juhuc kădoc qaqa irec ine manapene wawahane ezejec.

²⁰ Ţic moc e Anuture dăŢ âzăcne qazuc ekicne i mana rereŢ eocmuŢi juhăc qăhămoocmu, â moc e WofuŢtao roweckehuc juocmu ere manapene Ţerine eocmu.

²¹ Ţic moc e maŢqărăŢghec jume honeră Ţic mamana sarichec mucneengopieŢ, ehame dăŢ biăŢne mume aŢac-jopaha mana zăkieeŢgopieŢ.

²² MaŢqărăŢŢi Ţic mamanahec jaŢerao opă zăŢe iŢucne eekac, â Ţic mutuc matacne jaje wiac qaqazu-jare izi ine damenŢ sisipiric eekac.

²³ Ţic maŢqărăŢgheczi dăŢ muzo mură qanaŢ mana biric eekac, eră ie dăŢ mume Ţic jaje aŢac-jopaha mana zăkieeŢgopieŢ.

²⁴ DăŢ biăŢnezi aŢac baŢacne eekac, eră maŢnăŢecko aŢac băfuahuc saha-năŢec baafeckeekac.

²⁵ Ţic năŢăc hata moc honeră biăŢne mecne muhapene sifu hata izi raku hămoc hao fisikac.

²⁶ Ţic moc e năŢă nă gapec eocte aŢac manahuc gie-ticne zoqachec baocmu.

²⁷ Ţic hehesicne jaje wiac hehesicne jaha eniŢte manasuengopieŢ, ehame dăŢŢenŢiczi zoc iŢucne băruŢkeră ima gie baekac.

²⁸ Ţic sindaŢne jaje gupe micko âke dăŢ muengopieŢ, ehuc Ţic âgoŢăc-ŢenŢic jaŢerao făfăuc băfuaengopieŢ.

²⁹ Ţic zăzăicne jaje Ţic âgoŢăc-ŢenŢic eatuc-jopahuc sisipiricko răec-jopaengopieŢ.

³⁰ Ţic zăŢe bazuc enăreeŢgopieŢ jaŢere ruc banŢepeneŢ, â sumăŢ kieŢgopieŢ jaje zika qaniŢte maŢŢeengopieŢ.

³¹ Ţic tiŢne jaje damenŢ zora juŢeengopieŢ, ehame jaŢqăŢ-ŢenŢic honepene eri hendiŢ-ŢenŢic eekac.

³² Ţic qac momori ere manapene wawahane eha Ţic kimbenŢ-ticne bemberŢe ere ine manapene fefene ezejec. Eră moc e Ţic guru săko bawahac-jopaocmu ere wăc iŢuc jaha manapene wawahane ezejec, â moc e maŢrăŢgenŢ-ticne bawahaocmu ere ine manapene fefene ezejec.

³³ Ţic jaje Anuturaonec dăŢ mananiŢte mu wioc ecnehuc qăsăi qaenŢgopieŢ, eme dăŢ okacne ine Anutu e jahac bătikie-jareekac.

17 NăŢă gukuckekicne i wama faio năhuc sifu irec manapene fefene ezejec, â sisi hăhăŢ faio tiwă băzi năŢă irec ine manapene wawahane ezejec.

² KiŢaŢ qaqa maŢqărăŢgheczi bombonŢ-ticnere Ţokă hehesicne mu bătiŢ

ecnehuc sâcne bawahaocmu, e iñuc erâ motec ere hahac qafâc jañere sâc jaha wâc ehuc merâfâc wiac rauckeocmu.

³Ñic jañe gol â siliwa wiac i zocko rike esâic epie wosâeekac irec sâc jaha Anutuzi ñic maññâñec ba esâic eekac.

⁴Ñic hehesicne jañe dâñ hehesicnere hazec râeengopien, â burecñic jañe dâñ sisipirichec i mana reren eengopien.

⁵Ñic moc e ñic hapetac moc mu âke sisic ecneocmuzi Mamac bâbâfua-ticne e wâc mâmâc ecneocmu, â moc e ñic âgo-ticne wiac hâhâwicne moc fuacneme honerâ bubiañ manaocmuzi ine bâbâtinñte bige eocmu.

⁶Ñic mocte motecfâc jañe mamac-jeñicte manapie fefene eekac, irec sâc jaha ñicqizec jañe ñosafâc-jeñic jañere manapie fefene wâc eekac.

⁷Ñic mutuc matacne jañe dâñ fârine mupie boc mi biangkeekac, â ñic fekicne jañe burecdâñ mupie sâqore-jâmbâñkeekac.

⁸Ñic gâcne jañe bâbâmiriñ monenñte manapie qañgec tinac eha izi gie i me i bazo murâ sâcne baocmu.

⁹Ñic jañe âgo egareninñte manasukicko ine wiac esâqore-garembiñ irec kiñ behe-jarezemec. Jañe wiac egarembiñ irec dâñ i giñkeme giñ murahuc jutecne âgo zuñuhuc-ñeñic i tâcne-fâreocmu.

¹⁰Ñic mamananhec e arec mocjaha sawa mu bâtin ecnepene mana-hâmoocmu, â ñic mutuc matacne e ine arec 100 qa bâtin ecnepene sifu mi manaocmu.

¹¹Wiac hâhâwicnere qaqafenñ gie baniñmu ñic hehesicne i jañerao hâmoczi hata kiñañ zocnehec raengopenenñ irec sâc fisiocmu.

¹²Qowi mimicne zâñene bea e motecfâcne jâoc rofârepie momori eha sifu jâuruzo murâ sâcne jâurunañmu mecne, â ñic mutucne mañsifuc-ticnehec ere ine hâwic-nâpo-jâmbâñkeme wisecnenezepenenñ.

¹³Ñic jañe wiac biangne eñarehapie okacne wiac hehesicne bâtikie-jarenigmuo ine hehesiczi ficmañ-ñeñicko mi omaeocmu.

¹⁴Dâñ fuñkerâ muhuc mu qaqatarac ee i opâ kanañ hehapene hawec fuaekac irec sâc ekac, irec dâñ fuñkehuc izia mocwâc behezo.

¹⁵Wofuñ e ñic sindañne mumbiañ-jopaengopien jañere mecne, â ñic tinñe musâqorec-jopaengopien jañere mâmâc maname mamakâcne eekac.

¹⁶Ñic moc e mamana tâmiric mutuc matacne juekaczi mamana roocte monenñ beheme wemo fârine moc fuacneocmu?

¹⁷Ñic ââgo eengopienzi mañjaunñ eec eengopien, â qoqomâ juengopien jañe wiac ñemâcne i babaficko de âsic eengopien.

¹⁸Ñic moc e mañ mamasasu tâmiric juocmuzi mutuc erâ ñic âgo-ticnere tofa bazuocte mupañkeocmu.

¹⁹Ñic moc e mu qaqataracte añac bajuocmuzi sâqocnere añackeocmu, â moc e sahac fefe dâñ muekaczi zârâ hâriñ hefâreocmu.

²⁰Ñic moc e mañ mamasasu-ticne sâqocne foha wiac ebac eme sifu mi biangkeocmu, â moc e dâñ simbiñne muhuc juocmuzi sisipiric bâfuaocmu.

²¹Motec moc e wiac mutucne ebac eekaczi mamac-ticne zâic busâqoc sawa bâfuacneekac.

²²Bubiañ faio juju izi nârâ bibiañ iñucne erâ basanañ-nâpohuc bâpiañ-nâpoekac, â busâqoc faio juju izi ine tâpiri-nâñec bawahaekac.

²³Mumutara ñic hehesicne jañe soñsoñko bâbâmiriñ monenñ rohuc dâñgieo dâñ muhasickeengopien.

²⁴Ñic mamananheczi wiac biangne ebac eocte mana tara-fâreekac, â ñic mamana tâmiric eki ine hata basaekac.

²⁵ Motec mutuc matacne e mamac-ticne zâic busâqoc bâfuacnehuc nengoc roro-ticne iŇuc jaha zâic fâro bâfuacneekac.

²⁶ Ňic tigne jaŇe sahaç taha moneŇ râenigte mujarepene mi sâckeocmu, â Ňic bianŇe jaŇe zika kiniŇte mupene sâqore-jâmbânkeocmu.

²⁷ Ňic mamana taraheczi dâŇ bocjaha kosa mi muocmu, â Ňic maŇ mamanasuheçzi maŇwamahec juocmu.

²⁸ Ňic mutuc matacnezi dâŇ moc mi muhuc mâc niniŇkerâ Ňeocmu ere wâc manapene mamana â maŇqârâŇhec jukac eocmu.

18 Ňic moc e Ňic gâcne âgo mi ejareocmuzi e jahacne sawa manasuhuc juocmu, ehuc Ňic gâcne jaŇe wiac irec me irec manapie sâckeha eki maname sâqoreocmu.

² Ňic mutucnezi wiac mana taraekac me mâcne irec manabâc mi eekac, ehuc e jahacne maŇko dâŇ fokac i sawa manaekac.

³ Ňic moczi wiac sindaŇne eocmu ere faio mimi busâqoc feocmu, ehame zâŇe biŇe-ticne omaeme mu âke sisic ecneniŇmu.

⁴ Ňic gâcne jaŇere mickonec dâŇ wahaekac i manapene maŇqârâŇte fuŇqizecne ehuc opâ zâkân qârâŇne â opâ fifisine irec sâc tinac eekac.

⁵ Ňic sindaŇne âgo ejarehuc Ňic bahacmâc jaŇere dâŇ muhasickepene mi sâckeocmu.

⁶ Ňic mutuc matacnezi fuŇkerâ dâŇ mu qaqatarac ehuc zika hotâckeocmu.

⁷ Ňic mutuc matacnezi dâŇ muhuc juju-ticne sipirickeekac, e jahacne dâŇzi bitiŇ ecneha razime kiekac hâcne.

⁸ Ňic nânâc gupe micko âkeç dâŇ irec manapene aŇacne eha maŇnâŇecko râepene hurâ foekac.

⁹ Ňic oŇoŇ juekac â Ňic wiac ima baekac jahe sâcjekic mocjaha.

¹⁰ Anuture dâŇ i huec sanaŇ iŇucne, irec Ňic tiŇnezi ira ferâ wamao sâcne Ňec foc eocmu.

¹¹ Ňic gâcne jaŇe moneŇ mafa wiac-ŇeŇicte manapie haesac sanaŇ zorice irec sâc ehuc Ňezic-nâpokac tinac eekac.

¹² Ňic maŇhuhuŇ juengopieŇ jaŇere manapene fefene eekac, â Ňic pepeç penaronghec jaŇe ine sisipiricte hatao raengopieŇ.

¹³ Go qanaŇ dâŇte hazec râezemec izi zâhec dâŇ okacne bâtikiezemec, go iŇuc mi ecmuo ine mutuc erâ mimi faio fecmu.

¹⁴ Ňic moc e jujure zoqac focneocmuzi huc zâic fuacneme sâcne qamaseocmu, â zoqac-ticne omaeme ie maŇticne gâcke-fâreocmu.

¹⁵ Ňic mamana saricheç jaŇe dameŇ sâc mamana zuhuckerâ ronigte afeckerâ giene baengopieŇ.

¹⁶ Go Ňic zâŇe biŇe sâkohec ere maio fuazo murâ ine bubiaŇte wiac moc afeckerâ bacne razemec.

¹⁷ Ňic moc e dâŇgieo dâŇticne fuŇkerâ mume manapie fârine eekac, izi zâhec ine kisâ-ticnezi Ňifecne mume fâri tâmiric eekac.

¹⁸ Ňic jahahec zâŇe biŇe sâkohec jahe dâŇgieo dâŇ mu qaqatarac epire qâsâi qapie dâŇjekicte fuŇne taniŇkeekac.

¹⁹ Go qomâge baficketec eki wâc Ňifec sacsanaŇge erâ Ňezicguocmu, me ehuc mu qaqatarac etec râpecguocmu.

²⁰ Ňic moc e dâŇ muocmu irec sâc jaha fârine bâfuaocmu.

²¹ DâŇ sasawa muengopenenŇ izi Ňifec juju-nâŇec Ňezickeekac, â Ňifec ine

sipirickeekac; irec dân mukic sâc fârine bâfuarâ manatec sâckezejec.

²² Go ñokac rohuc wiac biagne rocmu, ehame Wofunzi ehâmo-gareekac irec funne tanikeocmu.

²³ Ñic hapetaczi dân mume nunumu hawari eekac, â ñic monen mafaheczi dân mume ine zâzâicne eekac.

²⁴ Ñic gâcne jaje âgo hawari burec burec sawa enâreengopien, â ñic gâcne jaje ine hahac qa jaje ââgo eengopien irec sâc sirickehuc âgo enâreengopien.

19 Ñic hapetaczi siocmâc juocmu izi fefene eocmu, â ñic monen mafaheczi burecdân muocmu izi wawahane eocmu.

² Ñic moc e mamana tâmiric jume mi sâckeocmu, â moc e hata raocte zoqac boc ehuc hata qâsorieocmu.

³ Ñic gâcne jaje wiac mutucne ehuc sisipiric bâfuaengopien, ehuc Wofuntau âki heengopien.

⁴ Ñic monen mafa sâkohec e âgo bocjaha fuacneengopien, â ñic hapetac e ine âgofâc-ticne jaje râpeckeengopien.

⁵ Ñic moc e dângieo domahuc dân musifuckeocmu e okacne roocmu, â moc e burecdân muocmuzi bâbâtin sâcne mi wisecneocmu.

⁶ Ñic bocjaha jaje ñic zâje bîgehec bâbâmirin dân jazeengopien, â ñic bokifac jajehec ââgo ehuc junîgte boc ejareekac.

⁷ Ñic hapetac e hahac qafâc-ticne jaje qaisockeengopiente âgofâc-ticne jaje wâc behe-jâmbânkeengopien; ehame e âgo bacjopaocte gie sâko bâpiehuc juekac.

⁸ Go gahacne manasuhuc mamana funne funne rozemec, erâ mamana rokomec i bajuhuc juhâc qâhâmozemec.

⁹ Ñic moc e dângieo domahuc dân muhasickeocmuzi bâbâtin roocmu, â ñic moc e burecdân muocmuzi sipirickeocmu.

¹⁰ Ñic mutuc matacne jaje monen mafa sâkohec mi junzepien, â kîngan qaqa jaje ñic fekicne ñicbomboj mi ejarenzepien.

¹¹ Ñic mamanahec e kimben aaric-ticne sâcne fâre wahaoemu, â ñic moczi wiac sâqocne moc ecneme hone takirehuc behecneme sâcke-hâmoocmu.

¹² Ñicwofunzi aarickeme owackeekac i laionte owa igucne, â âgo mirin-ticnezi ine titikuczi kecqan bâgunuckeekac irec sâc ekac.

¹³ Motec mutuc matacnezi mamac-ticne sipirickeekac, â ñokac rângegnere dânzi hoe micpiic heekac irec sâc ehuc tatakic bâfua-nâreekac.

¹⁴ Fic hae â monen mafa wiac i nengoc mamacfâc-nâneg jajere merâfâc roengopenen, â ñokac mamanahec ine Wofunzi sawa bâfua-nâreekac.

¹⁵ Go ojon juzo murâ juzemec, erâ guj fohuc nânâre hâmozemec.

¹⁶ Ñic moc e Anuture sâcmutâc dân mana reren eocmuzi juhâc qâhâmoocmu, â moc e qâsuaocmuzi ine hâmo sipiric eocmu.

¹⁷ Ñic hapetac ehâmo-jarehuc manapie Wofun ecnengopenen ezejec, eki hâcne okacne bazu-jareocmu.

¹⁸ Ñonje naru motecfâc-ñenig piticne jaba juhapie qa bâtin ejarenzepien, inguc mi enigmuo ine sisipiric hatao rahapie bafic-jopangopien eocmu.

¹⁹ Ñic moc e damen sâc aaric onzon jaha manahuc juocmuo ine ecnepene furi râezejec, â hone qâoma ecnenangmuo ine aaric-ticnere zoczi nâjâcne faio feocmu.

²⁰ Go ɲic jaŋe baficguhuc dâŋ bianne gazapie mana rereŋ ezemec, go iɲuc erâ juku maŋqârâŋhec ecmu.

²¹ Ɔic nâŋâc mamanani wiac fuŋne fuŋne irec dâŋ mana biric ezo murâ sâcne enaŋmu, ehame Wofuŋte micdâŋzi ine fârinehec eocmu.

²² Buchârô nânâ i wiac mamakâcne. Nâŋâc ɲic hapetac ere manapene fefene eha burecɲicte manapene wawahane eekac.

²³ Go Wofuŋ araŋ bacnehuc juzemec. Go iɲuc ehuc dameŋ zora wama faio juhâc qâhâmohaŋtec sisipiric wiac izi me izi moc mi maicguocmu.

²⁴ Ɔic gâcne jaŋe qâoma sâko ehuc nânâ wiac micjeŋicko râeniŋte takic-jopame mâc ɲeengopieŋ.

²⁵ Ɔic pepec penaroŋhec jaŋe qa bâtiŋ ejarepie fuŋne-jeŋic mananzepieŋ, ɲic maŋqârâŋhec jaŋe mu bâtiŋ ejarepie ine mamana-jeŋic qârâŋkeocmu.

²⁶ Motec sindaŋne â qaqaharicnezi sawa mamac-ticne bâzâickeocmu â nengoc-ticne ficticnaonec jâpeme raocmu.

²⁷ O motec-mae, go zuhuckerâ mamana rozore takicguocmuo ine juwicnao mamana romerŋ i wâc nikecguocmu.

²⁸ Mumutaniŋ ɲic hehesicnezi dâŋgie tiŋnere maname fâri tâmiric eekac, â ɲic sindaŋne jaŋe wiac hehesicnere aŋac-jopaekac.

²⁹ Kâcbiŋ i ɲic mu âke sisic eengopieŋ jaŋere biŋe bâfuakicne, ɲic mutucne sahac fefe eengopieŋ jaŋe hâcne zikare biŋe.

20 Ɔic jaŋe opâ sanaŋ bocjaha nârâ mutuc bacjopame bebe qahuc dâŋ ojowa kosa eengopieŋ. Opâ sanaŋ nâku maŋsifuc ee i wiac mutucne.

² Ɔoŋe laiŋ owa-ticnere hâwic-ɲopaekac irec sâc jaha ɲicwofuŋ aaric-ticnere hâwic-ɲopazejec. Ɔoŋe ɲicwofuŋ maŋbâiŋ ecnehuc manapie juju-nâŋec doc baŋgopeneŋ ezejec.

³ Ɔic mutucne jaŋe dâŋ mu qaqatarac eengopieŋ; mu qaqatarac tâmiric juju izi ine wiac bianne ekac.

⁴ Ɔic moc e gie hesarac dameŋko qâoma juocmuzi qa roro dameŋ maickeme nânâ basaocmu.

⁵ Ɔic maŋ mamananu-nâŋec i nombâŋ zoricnao opâ ɲeekac irec sâc, i ɲic mamana taraheczî sawa fâreme wefuocmu.

⁶ Ɔic bocjaha jaŋe jaŋacne manapie tiŋne â bianne juŋgopeneŋ eekac, ehame sifu ɲic bianne moc bâfuananŋte babasa gie sâko baengopeneŋ.

⁷ Ɔic moc e siocmâc juhuc wiac tiŋne ebac eekac ere naru motecfâc jaŋere manapene zerine eekac.

⁸ Ɔicwofuŋ e dâŋ mumutara ɲeje-ticnao gehuc wiac hehesicne hone zâŋjitac efâreocmu.

⁹ Ɔic moczi ziɲuc sâcne muocmu: “No sâqocne tâmiric juekopacte maŋnanezi mumu hehec mocwâc mi enareekac?”

¹⁰ Ɔemâc bâbâfuare sâc â meda wiac sâctiri babaju i Wofuŋte maio wiac mamakâcne eekac.

¹¹ Naru motec jaŋe eebapa-jeŋiczi fuŋne-jeŋic bataniŋkeekac, eme honec-jopapene bianne â siocmâc juengopieŋ irec fuŋne tanigkeekac.

¹² Wofuŋ e dâŋ manananŋte hazec-nâŋec râewec, â wiac hone tarananŋte zâŋe-nâŋec wâc bâfuawec.

¹³ Go guŋgie sawa bahuc dameŋ sipirickecmuo ine hapetac erâ jɲcmu, â guŋqâri juhuc gie zoqachec bacmuo ine nânâ mâriri fofu dundun fua-gareocmu.

¹⁴ Ňic moc e wiac furine baocte ehuc, "Furine boc fe kac," iŇuc manasurâ situâc rune zoqac ecneme furine bawahacneme rorâ rahuc sa hac-ticne mutenkeocmu.

¹⁵ Gol â qânâ furi sâko fuŇne fuŇne forakac, erâ sifu maŇqârân dâŇzi wiac i sasawa sirickerâ qânâ fuŇmoc furi sâko irec sâc ekac.

¹⁶ Ňic moczi mutuc erâ Ňic âgo-ticnere tofa bazuocte mupaŇkeocmuo ine Ňaqi qoruc-ticne hotâ jâoc rorâ râepene foha mumupaŇ-ticnere fârine bâfuazejec.

¹⁷ Go sioc ehuc wiac nânâne bâfuarâ nâtec qanaŇ aŇacne eocmu, izi zâhec ine nâkâcnehuc manatec maracgao hâtâ qinŇine eocmu.

¹⁸ DâŇ biaŇne mutâcne-garehapie irec sâcko gie batec fârinehec eocmu, irec go dâŇ manasu biric ehâmorâ ie zikao razemec.

¹⁹ Doc bapa Ňiczi dâŇ sogne sâcne mi bajuocmu, irec Ňic moc dâŇ bocjaha woseekac e dic bacnenze pieŇ.

²⁰ Go nengoc mamac jahecge sâwec-jofacmuo ine lambezi dapâcko hâpoekac irec sâc jujugezi omaeocmu.

²¹ Go biac jaha moneŇ mafa sâkohec eze pac, iŇuc muhuc fâro faio giene mi bâhâmocmuo ine zâhec soka sawec ehuc biaŇne mi baficguocmu.

²² Go ziguŇ mi muzemec: "Sâqocnere okacne i no nahac bazupemu," aricne, go WofuŇtao sawa roweckehuc juhaŇtec eki sâcne baficguocmu.

²³ Ňemâc bâbâfuare sâc wiac sâctiri bajuengopieŇ jaŇe WofuŇzi qaisoc-jopaekac.

²⁴ MâreŇŇic nânâc juju-nâgecte hata mi mana taraenggopeneŇ; WofuŇzi sawa mutâcne-nâreekacte raenggopeneŇ.

²⁵ Go wiac irec me irec fâro faio ziguŇ mi muzemec: "I WofuŇte biŇe." Go zâhec irec busâqoc manahaŇtec mumupangezi bitij egarezacte iŇuc mi ezemec.

²⁶ ŇicwofuŇ maŇqârânhecz i Ňic sindaŇne hone zânŇitac eja rerâ busâqoc mi mana-jarehuc qa bâtiŇ ejareekac.

²⁷ WofuŇ e maŇ hohone runezi maŇnâŇec batamaehuc maŇnâŇecte fuŇne bajaŇgeŇkeekac.

²⁸ ŇicwofuŇ moc guriŇ bapa gie-ticne siocmâc, fâreteŇ â aijkac jaha bahuc juocmuzi ŇicwofuŇ ŇeŇe-ticne basanaŇkeocmu.

²⁹ Nânâc Ňicmotec jaŇe tâp i ri-ŇeŇicte hone warec ejareenggopeneŇ â ŇicraŇqa jaŇe ine jaŇqân-ŇeŇicte araŇ bajareenggopeneŇ.

³⁰ DamerŇ gâcnao zika â wiac hâhâwicne sâko fua-nâreme sawa eebapa-nâŇec hehesicne qaisockehuc râpeckeenggopeneŇ.

21 WofuŇ e opâ sâko guriŇ bacneme hata-ticnao raekac irec sâc jaha ŇicwofuŇte mamasu soŇaŇkeekac.

² Ňic nânâc wiac ebac eenggopeneŇ sâc i manapene sâckeekac, WofuŇzi ine fuŇne weniguŇte wiac eenggopeneŇ i hone mana tarac eekac.

³ WofuŇ e taha bâzire mâcne, bâbâtiŇ â tiŇne juju biaŇne irec maname fefene eekac, irec go wiac sasawa fâreteŇ jaha ebac efârezemec.

⁴ Pepec zânŇe fifi â maŇfefe ee, wiac sâqocne izi hâcne Ňic sindaŇne mufuac-jopaekac.

⁵ Go giege aijkac jaha manasu biric ehuc batec fârine bocjaha fua-gareocmu, â fâro faio bahuc ine fârine basacmu.

⁶ Go sioc ehuc mafa mâriri bâfuaekomec izi mi zo raha hâmocte micko

râecgurâ mocwâc omaeocmu.

⁷ Ɔic sindagne jaje eebapa tiŋne qikiŋneengopienŋe jaŋacne eebapa repicnezi bitin ejareha razipie kicjopaekac.

⁸ Kiŋ bahac bâfuaengopienŋi hata hehesicnao raengopien, bahac fâsâc jaje ine wiac ebac epie tiŋke bian efâreekac.

⁹ Ɔokac rângeŋe ehac fic bianŋao juju izi wiac wawahane eekac, â e tâmiric kâte bozeo buc juju izi ine wiac fefene eekac.

¹⁰ Ɔic sindagne jaje dameŋ sâc wiac hehesicnere boc ejareekac, jaje Ɔic mocte busâqoc moc mi manaengopien.

¹¹ Ɔic mu âke sisicne qa bâtin ejarepie mutucne jaje honerâ mamanahec enigm, Ɔic maŋqârânhec jaje ine wiac qazu-jarepie zuhuckerâ mamana fua-jareocmu.

¹² Tiŋne rune e Ɔic sindagne jaŋere mamanasu hone manac efâreekac, ehuc sisipiricko râec-jopaekac.

¹³ Ɔic moc e hapetac jaŋere wira wâwâsicŋe hazec mi râeocmuo ine juku e jahacnere wira wâwâsic eme e wâc iŋuc jaha mi bafickezo.

¹⁴ Ɔic moczi gore aaric manahame go soŋsoŋko wiac moc râcne tahac etec aaric-ticne qazue wahaocmu.

¹⁵ Mumutin gie bianŋe bapie Ɔic tiŋne jaje bubian mananigm, â Ɔic hehesicne jaje ine bipic tatara ejareocmu.

¹⁶ Ɔic moc e mamana bianŋe qikiŋneocmuzi hâmokicne jaje qâtec-jopaocmu.

¹⁷ Ɔic moc e sahacte wiacko mamaŋ gugutun hurâ juhuc waig â nânâ wiac nâ râmbe eocmuzi Ɔic mafa sâkohec mi juocmu.

¹⁸ Ɔic sindagne jaje Ɔic tiŋne jaŋere faio wiac zârâ zâpânehec râezo muengopien izi Ɔerisierâ jaje jaŋacne faio feekac.

¹⁹ Ɔokac rângeŋ qanqanŋe â hâdi boŋkekiecne ehac juju i wiac wawahane, â mâreŋ burocnao buc juju izi ine wiac fefene.

²⁰ Ɔic maŋqârânhec jaje moneŋ mafa wiac-jeŋic bianŋe qâzuckepie fojareekac, â Ɔic mutuc matacne â iric iricne jaje ine bâfuaengopien sâc kosa behepie rafâreekac.

²¹ Ɔic moc e tiŋne juju â mirin babac ee irec henŋirigneocmuzi zâŋe bigehec erâ juhâmoocmu.

²² Momori Ɔic maŋqârânheczi Ɔic tâpirihec jaŋere haesac sanaŋ henŋan qanŋanŋeocmu, ehuc hæ sanaŋ-jeŋic ro rauc sâcne eocmu.

²³ Ɔic moc e micticne soŋanŋeocmuzi zârâ hâriŋ faio boc mi feocmu.

²⁴ Sahac fefe juhuc pepece penaron â piczon eengopien jaŋere "Ɔic mu âke sisicne" muzu.

²⁵ Ɔic moc e giere takickeme ojon juocmuzi e jahacne saha sipirickeocmu.

²⁶ Ɔic sindagne jaje dameŋ sâc Ɔic âgofâc-jeŋic jaŋere wâcwiac irec andac eengopien, â Ɔic tiŋne jaje ine wiac-jeŋic mi sakarehuc buafec jaha qikiŋneengopien.

²⁷ Ɔic sindagne jaje taha bâzi rikepie Wofunŋi maname mamakâcne eekac, jaje manŋenicko wiac qame gâpâcne foha bâzi rikepie iŋuc hâcne mana-jareekac.

²⁸ Mumutanin Ɔic burecnezi sipirickeocmu, â moc e dânŋicne manatâc qâtac ehuc fâretin jaha muocmuzi ine juhâc qâhâmoocmu.

²⁹ Ɔic sindagne jaje râsi zâŋe fiengopien, â Ɔic tiŋne jaje ine hata-jeŋic

mana taraengopienj.

³⁰ Maŋqârâŋ â mamana tara erâ mumutâc dâŋ bianje wiac i sasawa Wofunje maio wiac omane efâreekac.

³¹ Ŋoŋe becâsicfâc-ŋeŋic zikare bazawiec-jopazo murâ bazawiec-jopanzeŋienj, â zikao sasanaj bâbâfua i ine Wofunzi bâfua-ŋareocmu.

22 Ŋoŋe monej mafa sâkohec eniŋte mâcne, zâŋe biŋehec juniŋte eŋarezejec, â ŋic jaŋe bubiaŋ qaŋarenigmu irec manapie fefene eha siliwa â gol irec manapie wawahane ezejec.

² Wofunzi mafaŋic â hapetac mâmâc bâfuac-jopawecte funje-jekic bârâwiŋ mi fokac.

³ Ŋic maŋqârâŋhec jaŋe sisipiriczi maic-jopame honerâ kizuenggopienj, â ŋic maŋqârâŋ tâmiric jaŋe ine hone-bipiehuc rarâ sipirickeenggopienj.

⁴ Go maŋhuhun juhuc Wofunj araj bacnetec monej mafa â zâŋe biŋe fua-gareme damenj zora juhâc qâhâmocmu.

⁵ Go jujuge ŋezickezo murâ ine hata heririgko wiwitic wiac râepie foha ŋic sindaŋne jaŋe razipie kicjopaekac i kizuzemec.

⁶ Go naru motec jaŋe juju hata bianje qazu-jarezemec, eme jaŋe jufenigmu sâc irec manasuhuc juniŋmu.

⁷ Ŋic monej mafahec jaŋe ŋic hapetac ŋicbomboŋ ejareenggopienj, â monej hotâ roenggopienj jaŋe monej jareenggopienj jaŋere mic sâcko gie baenggopienj.

⁸ Ŋic moc e wiac sindaŋnere gie baocmu e juku irec fârine sisipiric roocmu, bâbâtij hâhâwicnezi fuacnehuc bâsiroweocmu hâcne.

⁹ Ŋic moc e afeckerâ nânâ wiac-ticne ŋic hapetac kâdoc qajareocmu e jambunkezo.

¹⁰ Ŋic mu âke sisicne e jâpepie raha ŋoŋerao zika â mu qaqatarac erâ mumusific wiac gâcne i wâc omaeocmu.

¹¹ Ŋic dâŋ wokemaŋnehec muenggopienj jaŋe ŋicwofunzi âgo ejareekac, â Wofunzi maŋ qaqacne juenggopienj ŋic i jaŋere maname biaŋkeekac.

¹² Wofunj e ŋic mamana tarahec jaŋere dâŋ dopeckeekac, â burecŋic jaŋere dâŋ ine qame wahaekac.

¹³ Ŋic ojoŋnezi dâŋ kecziŋuc muhuc ficko ŋeekac: "Laionzi hae zoŋao jukacte huhape nâcnuzackohec."

¹⁴ Boe sau ŋokac ere dâŋ i nombâŋ igucne, irec Wofunzi qaisoc-jopaekac jaŋe ira hâcne huenggopienj.

¹⁵ Naru motec jaŋe qieonecteaŋ funkerâ wiac mutucne kosa eenggopienj, ehame bâbâtigko râec-jopapene ine beherâ sâcne mac juenggopienj.

¹⁶ Ŋoŋe ŋic monej mafa sâkohec wiac jare tahac eniŋmuo me ŋaŋac mafa mâririhec eniŋte ŋic hapetac bâzâic-jopanigmuo ine ŋoŋe ŋaŋacne hapetac erâ juniŋmu.

Ŋic maŋqârâŋhec jaŋere dâŋbiri moc

¹⁷ Go hazec râehaŋtec ŋic maŋqârâŋhec jaŋe dâŋ gâcne mumbiŋ i qazu-garepe mamana gie bazemec. ¹⁸ Go iguc erâ zâhech manasuhuc ŋic gâcne jaza qazuc ehuc bubiaŋ manacmu. ¹⁹ Go Wofuntao roweckecmurâ manasuhuc maŋqârâŋ dâŋ zi hâcne gaza mutâc ekopac. ²⁰ No gore erâ maŋqârâŋ â mumutâc dâŋ 30 sâko qâreŋkepo. ²¹ Erâ no dâŋ fâri qizecne

qazu-garepemu wâc, eme go irec mu wioc egarepie okacne bâtikie-jarecmurâ mi eipiecmu.

1

²² Go ȳic hapetac e hapetac juekacte wiac-ticne kânggâc mi jâoc rozemec, â ȳic moc e dânggieo wiȳec tâmiric domaha mu bawahac mi ecnezemec.

²³ Wofuȳzi ȳic iȳucne jaȳe bafic-jopahuc juju-jenȳic jowac roenggopierȳ jaȳere juju jowac roocmu hâcne.

2

²⁴ Go ȳic maȳzocheȳ jaȳe âgo mi ejarezemec. ²⁵ Go jaȳere eebapazi bitin egareha raziteȳ kicguzacte jaȳerao mi qohotazemec.

3

²⁶ Go ȳic mocte tofa bazucmurâ moc mi mupaȳkezemec. ²⁷ Manakic, go mumupaȳgere fârine bâfuazo eipiehuc juhaȳtec wiac gâcne gowac rohuc fofo mâkige wâc mâmâc gowac ronȳmu.

4

²⁸ Apa ȳosafâcge jaȳe mâreȳ ma râembȳ i bazic baefuc mi ezemec.

5

²⁹ ȳic moc e gie-ticne basarickehuc baocmu e ȳic omane jaȳe mâcne, ȳicwofuȳ kiȳaȳ qaqaȳare irec sâc bâfuaocmu.

6

23 Go ȳic fekiecne moc ehēc nânâ nâcmuo ine ȳic wenigucne ehēc ȳekopac i manasuzemec. ² Ehuc go nânâ bocjaha nâekicko sifu âmbânȳ mi nâzemec. ³ E esâicguhuc nânâ aȳacne râe bâmoc eha go hone fâfârerâ gaȳec tâmiric mi nâzemec.

7

⁴ Go maȳqârânheȳ juhuc moneȳ mafa sâko bâfuacmurâ tâpirige mi sipirickezemec. ⁵ Manakic, tucwipezi furuc furuc qahuc ratâmireekac irec sâc jaha moneȳ mafagezi fakecneheȳ erâ ratâmireocmu.

8

⁶ Go ȳic buchâro ehēc nânâ mi nâzemec, me nânâ aȳacne râe bâmoc eekac irec andac wâc boc mi ezemec. ⁷ E nânâ garehuc ȳifec ine upegao baocmu. Ehuc maȳticnezi gorao mi domaha miczi burec erâ zȳȳuc gazahuc eatucguocmu: "Ware nânâ opâ nâc." ⁸ Go ere nânâ wiac nârâ maȳucmu, ehuc daȳgedânȳ âzâcnetec fârîmâc eocmu.

9

⁹ Go ɲic mutuc matacne ere maio dâŃ mi muzemec, e maŃqârâŃ dâŃge mi mana tarahuc qaisockeocmu.

10

¹⁰ Apa ɲosafâcge jaŃe mâreŃ ma râembiŃ i baɲic baefuc mi ezemec, erâ bekâ mâsiŃ jaŃere mâreŃ wâc mi jowac rozemec. ¹¹ WofuŃ e jaŃere ɲeɲezic hâcne, irec dâŃgieo jaŃere dâŃ dopeckehuc gore dâŃ bawahaocmu.

11

¹² Go qaqazugere dâŃte hazec râehuc tâpiri fogarekac sâc mamana gie bazemec.

12

¹³ Go naru motec bâtiŃ-jopazore manabâc mi ezemec, jaŃe kâcbiŃ kirâ mi hâmoniŃmu, ¹⁴ aricne, kâcbiŃ kirâ juju bapa-jeci biãŃkeocmu.

13

¹⁵ O motec-mae, go maŃqârâŃheç erâ jucmuo ine bunane biãŃkeocmu. ¹⁶ Micbipicgaonec maŃqârâŃ dâŃ wahame manarâ ɲeri bari epemu.

14

¹⁷ Go sâqocne bapa jaŃere erâ maŃge mi bâruŃkezejec, WofuŃ ine damerŃ sâc araŃ bacnehuc juzemec. ¹⁸ Go iŃuc ehuc juhaŃte woworicgezi mi omaeocmu.

15

¹⁹ O motec-mae, no gazape manac: Go maŃqârâŃheç juzemec, ehuc hata fâretinŃko jaha maŃ mamanasuge râetec fozejec. ²⁰ Go ɲic waiŃ âmbâŃ nânâ me nânâ gapecmâc nâengopiŃ jaŃere ɲondeŃko boc mi juzemec. ²¹ Opâ sanarŃ â bec qowi âmbâŃ nânâ ɲic i jaŃe hapetac erâ juniŃmu, ehuc ojor fohuc ɲaɲi qoruc basaniŃmu.

16

²² Go mamac bâbâfuage ere dâŃ manahuc juzemec, â nengocgezi ɲokac qizec erâ juha mi qaisockezemec. ²³ Go dâŃ fâri qizecne, maŃqârâŃ, maŃsowa juju â mamana tara i furine barâ bajuhuc monerŃte erâ mocwâc mi qikiŃnezemec. ²⁴ ɲic tiŃnere mamaczi ɲeri eocmu, â ɲic moc e motec-ticnezi maŃqârâŃheç jume bubiaŃ manaocmu. ²⁵ Go juju bapagezi nengoc mamac jaheçge bubiaŃ qajactezemec, ehame nengoc rorogezi gore erâ ɲeri bari ezejec.

17

²⁶ O motec-mae, go mange norao râetec fooc, ehame kike hata-nane honehuc juzemec. ²⁷ Hata ɲokac iriŋ biriŋne â sasec ɲokac jaŋe bitiŋ egarehapiẽ razitec kihâmocguocmu: ²⁸ Ɔokac i jaŋe hâcne fiuc roro ɲic jaŋe iɲucne ruc bahuc juẽŋgopiẽ, ehuc ɲic bocjaha eatuc-jopapie ɲonâŋfâc-jẽŋic beheç-jopaẽŋgopiẽ.

18

²⁹ Mozi zârâ zâpâo â busâqoc faio juekac, me mozi mu qaqatarac â muheŋqâŋhec juekac, me mozi fuŋne tâmiricko wic fuacneekac, me mozi zâŋe bârũghec juekac? ³⁰ Waĩ opâ nâhuc ɲehapie ɲafe zâŋiŋkeekac, erâ waĩ opâ fuŋne fuŋne bâsifuckerâ nâẽŋgopiẽ ɲic i jaŋe hâcne wiac i fua-jareekac. ³¹ Go waĩ opâ bâbâroŋ â qaqac taẽŋe i opâ nânâ kirũŋko du âtehuc wefume hone aɲac erâ sifu âmbâŋ mi nâzemec. ³² Manakic, go waĩ opâ gapecmâc nâku guŋ fohanŋec hae fureme manatec homa momorizi kicnume huc fua-nareekac irec sâc egareocmu. ³³ Ehame zâŋege bâniŋkeme wiac zâŋe furu honecmu, erâ mamanasuge sifuckeha dâŋ musifuckecmu. ³⁴ Go ɲic moczi wokeo rahuc maŋuekac, â hâwec siri sâko qaha jâmâ wâtũŋko wiserâ feekac irec sâc ecmu. ³⁵ Ehuc kecziŋuc mucmu: "Ɔic jaŋe mi manahape numbieŋ mecne, jaŋe qa bâzâic enarembieŋ me wenĩŋuc i mi manasukopac. No wemocte mi qârekopac? No waĩ opâ zuhuckerâ nâzore enarekac."

19

24 Go ɲic hehesicne jaŋe iĩguuŋ mi ejarezemec, ehuc jaŋehẽc ââgo ecmurâ mi fotariezemec. ² Jaŋe bâbâzâic gie baniŋte maŋjeŋic domaekac, â micjeŋickonec dâŋ wahaekac i sisipiric dâŋ sasawa.

20

³ Ɔic maŋqârâŋheczi ficticne basarickeocmu, â ɲic mamanaheczi ficticne basanãkeme ɲehuc juocmu. ⁴ Ɔic mamana sarichec e ficticne maŋne maŋne ba bâpiaŋ ehuc wiac furi sâko râe raocmu.

21

⁵ Ɔic maŋqârâŋheczi ɲic sasanãghec sirickeekac, â ɲic mamanaheczi ɲic tâpiriheç ere sâc jâuruekac. ⁶ Go maŋqârâŋ dâŋzi basanãgupie zikao sâcne racmu, â dâŋ bianne bocjaha mutâcne-garepie irec sâcko zika qahuc sâcne sanãgkecmu.

22

⁷ Maŋqârâŋ dâŋ i ɲic mutuc matacne ere sâc sirickeekac, irec e tutumaŋko dâŋwĩac fârine muc manac ehapie dâŋ bianne moc muocte quŋkeocmu.

23

⁸Ŷic moc e wiac hehesicne eocte mana biric eocmu ere Ŷic sindagne muniŶmu. ⁹Ŷic mutuc matacnezi wiac kosa manasu biric eme sâqoreekac, â Ŷic mu âke sisicne ere ine manapie mamakâne eocmu.

24

¹⁰Go dameŶ biagnaŶ docke betan ecmuo ine dameŶ ŶemâcnaŶ iŶuc jaha betanke-jâmbânkecmu.

25

¹¹Go Ŷic moc hâmoocko râezo ehapie mejeŶickonec bataracmurâ mâcne afecne mi ezemec. ¹²Ehuc ziŶuc wâc mi muzemec: "No Ŷic e mi manakopac." Manakic, Anutu e dâŶ iŶucne i weniguŶte mukomec i manakac, e mangere fuŶne manahuc hone jâjâpecguekac. Eki hâcne Ŷic eebapa-jeŶicte okacne bazu-jareekac.

26

¹³Motec-mae, go baŶac nâzemec, baŶac i wiac biagnê hâcne. BaŶac opâne qânnaonec ro nâc etec maracgao aŶacne eocmu. ¹⁴Eme go irec sâc jaha mamana tara â maŶqârân mana maŶ etec maŶ qâqâtâcge bâpiaŶ-kezejeŶ.

27

¹⁵Go Ŷic tiŶne ere wiac fiuc rocmurâ ficticne mi somâckezezemec, me fiŶ hae-ticne wâc mi hetâtiezemec. ¹⁶Manakic, Ŷic tiŶne e gâbâ jaha waha qarâ sifu mocwâc fahareekac, â Ŷic sindagne e ine sisipiriczi bâsiroweocmu.

28

¹⁷Go kisâge wiac hâhâwicne fuacneham e bubiaŶ mi manazemec. ¹⁸Go iŶuc etec WofuŶzi honerâ maname mi sâckeha kisâge Ŷezickezacte iŶuc mi ezemec.

29

¹⁹Go Ŷic hehesicne jaŶere erâ mange mi faharezejeŶ, â Ŷic sindagne jaŶe wâc iinguuŶ mi ejarezemec. ²⁰Ŷic hehesicne jaŶe juku omaeniŶmu â Ŷic sindagne jaŶere lambe tatamac i hâpoocmu.

30

²¹O motec-mae, go WofuŶ â ŶicwofuŶ jahe mâmâc jaha araŶ bajactezemec, ehuc dâŶjekic qataraengopieŶ Ŷic i jaŶere ŶonderŶko mi juzemec. ²²Sisipiriczi Ŷic iŶucne jaŶe ututuŶ jaha maic-jopaocmu. Ehame

Wofuŋ â ɲicwofuŋ jaheraonec sisipiric weninucne fuaocmu i goki moc manakic me?

Maŋqârâŋ dâŋ gâcne gâcne

²³ Ɖic maŋqârâŋhec jaŋe dâŋ kecziŋuc mumbiŋ wâc:

Mumutara ɲic e ɲic bârâwiŋ-joparâ gâcne jaŋere dâŋ muafeckehuc gâcne jaŋere mu mâmâckeme mi sâckeocmu. ²⁴ E ɲic bahachec jaŋe ziŋuc jazaocmu mecne: "Ɖoŋe bahac tâmiric," iŋuc jazame mâreŋ sâc ɲicne ɲicne jaŋe e qaisockehuc sâweckeninŋmu. ²⁵ Â ɲic bahachec bâtiŋ-jopaninŋmu mumutara ɲic i jaŋere zâŋe biŋe feha bubiaŋ manahuc juhâc qâhâmoninŋmu.

²⁶ Dâŋ okacne fâretinŋ jaha mumu izi maŋ mocjaha jujure ma ekac.

²⁷ Go qanaŋ hae zoŋage emasaŋkerâ nânâ giege he sarac ezemec, izi zâhec ine ficge bazemec.

²⁸ Go fuŋne tâmiricko ɲic âgoge dâŋgieo mi râezemec, erâ dâŋticne wâc mi muhasickezemec. ²⁹ Go ziŋuc mi muzemec: "E wiac enarewec irec sâc jaha ecnezepac, no okacne bazucnepemu hâcne."

³⁰ No ɲic ojoŋne â mutuc matacne ere giegaŋ â waŋ gie fotâcnerâ rahuc wiac ziŋuc honepo: ³¹ Giegaŋ-ticne i zârâ uupic â hofâ qinziŋzi sâcke-fârewec, â râckerâ sac fowec i zaŋke-fârewec. ³² Eme no iŋuc honerâ manatâc qâtâc ehuc ziŋuc mana tarapo: ³³ No rarâ guŋ piticne fopemu me ɲemanahuc sawa ropemuo ³⁴ ine hapetac jujuzi fiuc roro iŋucne maicnuocmu â roroczi zikaŋic iŋucne fisi-nareocmu.

Salomore maŋqârâŋ dâŋ gâcne

25 Salomore muqâqinŋ dâŋ gâcne Juda ɲicwofuŋ Hisikiare qâreŋɲicfâc jaŋe qâreŋkembinŋ zine hâcne.

¹ Anutu e wiac sasawa maŋbuc-ticne maname foekacte araŋ bacneen-gopenenŋ, â ɲicwofuŋ jaŋe ine wiac nâzâ mutâc eengopienŋ irec sâsec-jopaengopenenŋ.

² Ɖicwofuŋ jaŋe maŋjenicko dâŋ weninuc foekac i mi manaenggopenenŋ, jaŋere mamasu i nâgâcne mamasu sirickeekac, i qânikinŋ faic jâmbân ferâ fokac â hâwec fâhâŋne juwic jâmbân hurâ fokac irec sâc.

⁴ Ɖoŋe siliwa zocko rikepie wosâeme metâ bapazi wiac biagne i me i bazo murâ sâcne baocmu. ⁵ Ɖoŋe ɲic sindaŋne ɲicwofuŋte maionec bârâriec-jopahapie guriŋ bapa gie-ticne fâretinŋ jaha sâcne bahuc juocmu.

⁶ Go ɲicwofuŋte maio sahacge mi bafezemec, â ɲic fekicne jaŋe wâc mi âkehoc-jopazemec. ⁷ Manakic, jaŋe ziŋuc gazapie sâckeocmu: "Go zira ware mai jaha ɲec," ɲic fekicne ere maio ɲeŋege ɲic mocte biŋe qikiŋnecmurâ gazapie miminehec eocmu.

⁸ Go wiac hone manac eekic i acmâc jaha tutumaŋko mi muzemec, i zâhec ɲic moczi fuarâ goki dâŋ mucmu irec fuŋne bataninŋkehuc mimi busâqoc bâfua-gareme weninuc ecmu?

⁹ Go âgogehec dâŋɲekic fokacko ine ehac mufâsâezepirec, ehuc ɲic mocte fuŋne mi mufuazemec. ¹⁰ Iŋuc mi ecmuo ine dâŋge mananinŋmu jaŋe mimi qaqa egarepie zâŋe biŋege sâqorerâ fohuc juocmu.

¹¹ Dâŋ nusarickehuc mukicne i zuŋe gâpiŋ zeŋaŋhec mâmâc râekicne irec sâc.

¹² Ȧic mamananec moczi Ȧic āgo-ticne hazec rāeha uȦ sawaȦ ecneocmu ere manapene furi sāko ezeȦec.

¹³ ȦoaȦ fārorocko opā māteȦne nāpene bāgunuc-nāpoekac irec sāc jaha biȦedāȦ baraekac kiȦaȦȦic meȦāne eki bombōȦ-ticne ecneekac.

¹⁴ Taha wiac rāeniȦte dāȦ sawa muhuc fārine mi bāfuaengȦopieȦ Ȧic i jaȦe māȦāȦzi karorac fiȦneme omaeha hoe mi heekac irec sāc.

¹⁵ Ȧic feȦicne ere maio rumerā juhuc dāȦ āzācnekupene maȦticne urueme mana-nāreocmu.

¹⁶ Go baȦac bāfuarā aȦacte sāc sawa nāzemec, irec sāc jāuruhuc nācmuo ine maȦucmu. ¹⁷ Go Ȧic āȦoge riȦkoa sawa iqickezemec, gābā jaha iqicȦetec gore takicȦeme qaisocȦuzacte.

¹⁸ Ȧic moc e Ȧic āgo-ticne micko ākec ecneocmu e zika me qādiȦi me tepe motec micneheȦci hāhāmocko kieȦac irec sāc eocmu.

¹⁹ DamerȦ Ȧemācnao doc bapa Ȧic moctao rorōweȦe izi ine micȦiec-nāȦec goroc goroc eha qoza nāengȦopeneȦ, me kike-nāȦec demba qame hata raengȦopeneȦ irec sāc ekac. ²⁰ Me mutuc erā māmāteȦ damerȦko hāroȦkenzēpeneȦ muhuc ȦaȦi qoruc wiac-nāȦec hetaraȦaȦmu irec sāc eocmu. Ȧic moc e maȦ kukumbuc faio juha gae heȦnepene ine hāweȦci wiȦ zaekac irec sāc eocmu.

²¹ Rāsige nānāre hāmoha nānā gumezemec, ā opāre hāmoha opā gumezemec. ²² Go iȦuc ecnetec mimieȦuc zara mara eha WofuȦzi okacne bazu-gareocmu.

²³ Murazi karorac fiȦne sueme qāhāȦckerā hoe heekac irec sāc jaha gupe micko ākeȦci aaric bāfuaekac.

²⁴ Ȧokac rāȦgeȦe ehȦc fiȦ biāȦnao juȦi izi wiac wawahane eekac, ā e tāmiriȦ kāte bozeo buc juȦi izi ine wiac fefene eekac.

²⁵ MāreȦ zorickoneȦ biȦe biāȦ wareme mamana izi ine opāre hāmohuc opā māteȦne nāpene bāgunuc-nāpoekac irec sāc ekac.

²⁶ Ȧic tiȦne moc e Ȧic hehesicne doȦkeȦneocmu e opā zāȦe sohoȦȦeȦec me opā nombāȦko marasiȦ sāqocne beheȦene hume opā sāqoreekac irec sāc eocmu.

²⁷ Go baȦac bocjaha nāteȦ mi sāȦkeocmu iȦuc jaha Ȧic jaȦe mumbiāȦ-guniȦte zoqac eȦareteȦ mi sāȦkeocmu.

²⁸ Go kimbeȦ aaricȦe mi bawahacmuo ine hae moc sac tāmiriȦ Ȧeocmu irec sāc ecmu; hae iȦucne i rāsi jaȦe fiȦirā qa heropieȦ eniȦmu.

26 ȦoaȦ damerȦko hoe micȦāko heme mi biāȦkeekac, me hoe damerȦko ȦoaȦ zāȦāicne qame wāȦ mi sāȦkeekac iȦuc jaha Ȧic mutuc mataȦne mumbiāȦkeȦene mi sāȦkeocmu.

² FuȦȦe tāmiriȦko sāweȦ-nāȦopie fāri tāmiriȦ eocmu, wiac i sawa hehetāȦ wiȦe jaȦe hehetāȦneȦuc nāworuengȦopieȦ irec sāc ekac.

³ BecāȦiczi kāȦbiȦ kiȦeȦec ā doȦȦi micko kiki rāecnezo erā Ȧic mutucne qa bātiȦ ecnezo.

⁴ Go Ȧic mutucne wiȦio-ticnere okacne bātikieȦecneȦuo ine go gahacne wāȦ e iȦucne mutuc jaha ecmu.

⁵ Ȧic moczi e jahacnere maname maȦqārāȦheȦ juȦopac, iȦuc ezacte go wiȦio-ticne mutucnere okacne mutucne jaha bātikieȦecnezemec.

⁶ Ȧic moczi Ȧic mutucne moc biȦedāȦ-ticne baraocte soreocmu ere manapene e jahacne kike hetāȦneȦac irec sāc eocmu; e iȦuc ehuc sisipiriȦ

hotâckeocmu hâcne.

⁷Ńic mutuc matacnezi muqâqiq dâŃ muocmu i ńic moczi kike-ticne demba qame hata raekac irec sâc eocmu.

⁸Ńic moczi ńic mutucne mumbiangkeocmu e ine ńic moczi mutuc erâ tacbanjo qânâ basanangkeme mi raekac ere sâc eocmu.

⁹Ńic mutuc matacne moczi manqârâŃ dâŃ muocmu e ńic moc opâ sanaj nâku maŃne sifuckeme meticnaonec zârâ unuckeocme eipieocmu irec sâc eocmu.

¹⁰Ńic moczi ńic mutucne moc rorâ kiŃaj qaqa-ticne baocmu e ńic hatapecne ńotâcnehapie kosa muruc-jopaekac ńic ere sâc eocmu.

¹¹Ńic mutuc matacne moczi wiac mutucne eha arec jajahec eocmu e qâtozi nânâ wiac maŃurâ mocwâc risierâ nâekac irec sâc eocmu.

¹²Ńic manqârâŃ tâmiric moczi no manqârâŃhec jukopac muhame ńic mutucne jâmbâŃ moczi ere sâc sirickehuc bianje juocmu.

¹³Ńic ojonjezi dâŃ kecziŃuc muhuc ficko feekac: "LaioŃzi hae 3onao jukac."

¹⁴Motâczi bengu hahasic-ticnao domahuc rac warec eekac irec sâc jaha ńic ojonjezi fofot-nao fohuc foc forisic eekac.

¹⁵Ńic gâcne jaŃe qâoma sâko ehuc nânâ wiac micjenicko râeninte takic-jopame mâc ńeengopien.

¹⁶Ńic ojonjezi e jahacnere maname feha ńic 7 jaŃe maŃ mananasu-jenicko dâŃ fokac i mufuapie maname wawahane ekac.

¹⁷Ńic moc e ńic âgo-ticnere dâŃ muocme mi manacnehapie sifu muocmu e ńic moczi hatao rahuc qâto furune moc hazecnao roocmu ere sâc eocmu.

¹⁸⁻¹⁹Ńic moczi ńic âgo-ticne eatuckerâ ziŃuc muocmu: "No mâc 3oraŃ sawa ekopac," e ńic mutuc matacne moczi 3oc kosa turugkeme wiac zafâreekac me tepe motec kosa qâtâcneme raekac ere sâc eocmu.

²⁰3oc mocwâc mi henusuckepene hâpoocmu, â gupe micko âkec behepene dâŃ mu qaqataraczi wâc omaeocmu.

²¹3oc râqâcnere kinezi 3oc tucne qâhâsâekac â 3oc henusuckepene zahuc foekac irec sâc jaha ńic râŃgeŃjezi qaqatara bâfuaekac.

²²Ńic nâŃâc gupe micko âkec ee irec manapene afeckeha boc bajueŃ-gopenen.

²³Eeatuc dâŃ muhuc maŃ mananasu-nâŃecte fuŃje jâmbâŃ hesoŃkenaj-muo ine afezi hapec dodocne bahuc sahacnao qâren wiac baengopien irec sâc enajmu.

²⁴Ńic moczi qaisocguocmu e maŃticnao eeatuc foha micbipiczi sawa wokemaŃ dâŃ gazaocmu. ²⁵E dâŃ mume manatec aŃac baŃacne eocmu mecne, erâ ine qaqaisoc dâŃzi maŃnao fusucmarâ fokacte dâŃticne mi mana zakiezemec. ²⁶E qaqaisoc dâŃticne hesoŃkeocmu mecne, erâ sifu wiac hehesicne ebac eekac i ńic jaŃe hone manac eengopien.

²⁷Ńic hehesicne moc e ńic gâcne jaŃere nombâŃ rooqmuzi e jahac juocmu, â moc e mâren ńedumerâ ńic ńemac-jopaocte gufume e jahacne ńemackeocmu.

²⁸Go ńic moc qaisockerâ burec ecnehuc sipirickecmu; dâŃ gâgâpâcnezi sisipiric bâfuaekac hâcne.

27 Go tomâckore manasuhuc sahac fefe mi ezemec. Tomâcko wiac iŃuc me iŃuc fuaocmu i go mi manaekic.

² Go gahac sahacge mi mumbiankezemec, ɲic gâcne jaŋe mumbiangupie sâckeocmu.

³ Qânâ i wiac ɲemâcne â mongɲe i wâc wiac ɲemâcne jaha, erâ sifu ɲic mutucne .moczi maŋbâŋ enâreocmu i jahere sâc sirickerâ mocwâc ɲemâcne jâmbâŋ eocmu.

⁴ Aaric i wiac gâgâpâcne â sisipiric-ticnehec, mamanaunzi ine irec sâc jâururâ mocwâc mamakâcne jâmbâŋ ekac.

⁵ Hofao mu bâtiŋ ee izi wiac biagne, â maŋjaun aputacne izi ine wiac fâri tâmiric.

⁶ Âgogezi bâzâicgume manatec mi sâqorezejec, â râsigezi hâpo qâqâic egareme ine rucge bazemec.

⁷ ɲic moc e nânâ wiac gâcne nâ gapec erâ baɲacte maname aɲacmâc eocmu, â moc e ine nânâre hâmo sâqorehuc wiac hâtânere wâc maname aɲacne eha nâocmu.

⁸ ɲic moc e fic hae-ticne beherâ kosa juocmu e wipe jaŋe sareŋ-ɲeŋic beherâ sawao rac warec ehuc juengopieŋ irec sâc eocmu.

⁹ Wokemaŋ âsu â huc âsu izi bubiaŋ bâfua-nâreekac, â wiac zârâ hàriŋ-neheczi ine busâqoc bâfua-nâreekac.

¹⁰ Go gahacne âgofâc me mamacgere âgofâc jaŋere mi nikecguzejec. Go zârâ hàriŋ faio juhuc hahac qafâcge jaŋe baficguniŋte mi numu-jarezemec; jaŋe zoricko juhapie âgoge moczi bembenjo juhuc baficgume biaŋkeocmu.

¹¹ O motec-mae, go maŋqârâŋhec jutec bunane biaŋkezejec, ehame nore dâŋ muengopieŋ jaŋe okacne sâcne bâtikie-jarepemu.

¹² ɲic maŋqârâŋhec jaŋe sisipiriczi maic-jopame hone tarahuc kizuengopieŋ; â ɲic maŋqârâŋ tâmiric jaŋe ine hone-bipiehuc rarâ sipirickeengopieŋ.

¹³ ɲic moczi mutuc erâ ɲic âgo-ticnere tofa bazuocte mupaŋkeocmuo ine ɲaqi qoruc wiac-ticne hotâ jâoc rorâ râepene foha mumupaŋ-ticnere fârine bâfuazejec.

¹⁴ Go furi uupicte hahagne bahuc âgoge wiracnerâ furi biaŋ âzâcnetec maname sâwecnukac tinac eocmu.

¹⁵ ɲokac rângeɲnere dâŋ i hoe micpiic furicte erâ hehuc domaha hae ɲafeekac irec sâc ehuc tatakic bâfua-nâreekac. ¹⁶ Manakic, ɲic moc e mânâŋ bâniniŋkeocmu me mefâre-ticnezi wokemaŋ opâne basanaŋkeocmu e ɲokac iɲucnere dâŋ wâc sâcne bâniniŋkeocmu.

¹⁷ Wiac aenzi bakicne i aenzia zâmuengopeneŋ irec sâc jaha nânâc ɲic âgofâc-nâŋec jaŋeraonec mamana roengopeneŋ.

¹⁸ ɲic moc e nemuja jâc hone soŋaŋ ecneocmuzi fârine fuame sâcne nâocmu, â kiŋaŋ qaqa moc e bombon-ticne hone bafic ecneocmu e irec furine roocmu.

¹⁹ Nânâc opâo fipene hume mumuc-nâŋec jaha honeengopeneŋ, iɲuc jaha maŋnâŋecko fipene hume fuɲne-nâŋec hone taraengopeneŋ.

²⁰ Hâmoc haezi ɲic zuzuhuc jaha rocjopaocte ecneekac, irec sâc jaha ɲic zâŋe-nâŋeczi wiac zâŋe furu honeocte boc ecneekac.

²¹ Siliwa â gol i zocko rike esâic eengopeneŋ, ɲicte fuɲne ine zâŋe biŋe-ticnezi bataniŋkeekac.

²² Go ɲic mutuc matacne qâhâmozo qatecne mutuc-ticnezi sifu mi omaeocmu.

²³⁻²⁴ ɲicne ɲicne nânâc juju sanaŋ mi juengopeneŋ, iɲuc jaha mafa mâriri

i wâc fofo sanaj mi foekac, irec go lama bulimakaofâcge hone soŃaj biaŃne ejarezemec. ²⁵ Ehuc sapao nânâ wiac-jenji saratec fuame râec-jopatec nâhuc fua sawec enzepiej. ²⁶ Go iŃuc etec lama kanzagnezi Ńaqi qoruc bâfua-gareocmu, â noniŃfâcge gâcne jaŃe monenŃe râec-jopatec monen fuaocmu izi mârenŃ qâricne kitâcne-gareocmu. ²⁷ Ehame noniŃ gâcne jaŃere susuzi ine go gahacne â wiacfâcge erâ kiŃaj narufâcge ŃonŃere nânâ eocmu.

28 Ńic sindaŃne jaŃe moczi mi jâpec-jopaha jaŃac wiseengopiej, â Ńic tiŃne jaŃe ine laiŃj iŃucne sanajkeengopiej.

² Ńic guru moc jaŃe micne-jenjiŃi mamana â maŃqârâŃhec juhuc guriŃ bajareha sâcne sanajkerâ juniŃmu, â guru moc jaŃe qaŃatara â hehesic boc bâfuapie micnefâc-jenji jaŃe bâiŃpiec-joparâ ââkehoc eniŃmu.

³ GuriŃ bapa Ńic moczi Ńic hapetac bâzâic-jopaocmu e hoe mâŃâŃ sâkozi giegaj ima baekac irec sâc eocmu.

⁴ ŃonŃe sâcmutâc dâŃ qatarahuc Ńic sindaŃne jaŃe bafic-jopaniŃmu, â sâcmutâc dâŃ mana rerenŃ eniŃmuo ine râsi ejareninŃmu.

⁵ Ńic hehesicne jaŃe tiŃne hata kâuc baengopiej, â WofuŃ araŃ bacneengopiej jaŃe ine mana taraengopiej.

⁶ Ńic hapetaczi siocmâc juocmu ere manapene fefene eocmu, â Ńic monen mafa sâkoheczi siochec juocmu ere ine manapene wawahane eocmu.

⁷ Ńicmotec moc e sâcmutâc dâŃ mana rerenŃ eocmuzi maŃqârâŃhec juocmu, â moc e Ńic kosa jujune jaŃe âgo ejareocmuzi ine mamac-ticne mimi qaqa ecneocmu.

⁸ Ńic moc e Ńic âgofâc-ticne eatuc-jopahuc wiac-jenji sâctiri jowac rorâ e jahacne monenŃ mafa bâsokaocmuo ine Anutuzi mocwâc jâoc rorâ Ńic hapetac jare tahac eocmu.

⁹ Ńic moczi sâcmutâc dâŃ mana rerenŃ mi eocmu e Anutuzi nunumu-ticnere maname mamakâcne eocmu.

¹⁰ Go Ńic sioc tâmiric moczi hata hehesicnao raocte manasuhuc doc barâ nombâŃ romenŃ ira go gahac hucmu; â bahac tâmiriczi ine furi sâko roocmu.

¹¹ Ńic monenŃ mafa sâkohec jaŃe jaŃacne manapie maŃqârâŃhec jungopenenŃ eekac, â Ńic hapetac mamana tarahec jaŃe ine fuŃne-jenji hone taraengopiej.

¹² Ńic tiŃne jaŃe guriŃ bapa gie-jenji tâpirihec bapie Ńic jaŃe zenŃgoma zeri eniŃmu, â Ńic sindaŃne jaŃe guriŃ bapa gie bapie ine Ńic jaŃe soŃkeniŃmu.

¹³ Ńic moc e bahac-ticne hesoŃkeocmuzi mi juhâmoocmu, â moc e bahac-ticne mufuarâ râpeckeha Anutuzi aki anonoc ecneocmu.

¹⁴ Ńic moc e WofuŃ araŃ bacneocmu ere manapene zerine eocmu, â moc e maŃrâŃgenŃ bâfuaocmuzi ine sipirickeocmu.

¹⁵ Ńic sindaŃne moczi Ńic hapetac guriŃ bajareha bititieninŃmu, e laiŃj â bea jahe nânâ opâre hâmoŃuc momori eekopirec irec sâc eocmu hâcne.

¹⁶ GuriŃ bapa Ńic moczi mamana tâmiric juhuc Ńic zâzâicne eocmu, â moc e sioc wiac qikiŃneocmuzi ine guriŃ bapa gie-ticne damenŃ zora barahuc juocmu.

¹⁷ Ńic moc e Ńic âgonere soc hoŃkewecko ine Ńic moczi moc mi

bafickeha wise wise jukuhame hâmoc dameŋ-ticne maickezejec.

¹⁸ Ŋic moc e sioc tâmiric juhuc biankeocmu, â moc e siochec juocmuzi sipirickeocmu.

¹⁹ Ŋic moc e gie-ticne he sarac eocmuzi nânâ mâriri sâko bâfuaocmu, â moc e gie bapa dameŋ sipirickeocmuzi ine hapetac erâ juocmu.

²⁰ Ŋic sioc tâmiric dameŋ zora juhâc qâhâmoocmu, â moc e moneŋ mafa sâkohec eocte zoqac eocmu e ine bâbâtŋ fuacneocmu.

²¹ Ŋic mana wosâc ejarepene mi sâckeocmu. Mumutara ŋic gâcne jaŋe bâbâmiriŋ moneŋ hungaŋne mac sawa rohuc wiac hehesicne eniŋte manapie mi qunkeocmu.

²² Ŋic moc e wiac buchâro nâ bajuc eekaczi moneŋ mafa bâfuaocme zoqac sâko ehuc zâhec roroc fuacneocmu i mi manasuocmu.

²³ Ŋic âgoge mu bâtiŋ ecnetec zâhec mana-gareme biankeocmu, â wokemaŋ dâŋ ecnetec ine zâhec mana-gareme sâqoreocmu.

²⁴ Moc e neŋgoc mamac jahec-ticne jahere wiac fiuc rohuc ziŋuc muocmu: "Izi bahac mi ekac," iŋuc muocmu e sisipiric ŋic jaŋere âgo jaha eocmu.

²⁵ Ŋic moc e nânâ âmbâŋ nâekaczi dâŋ bâfuaekac, â moc e Wofuŋtao roweckeekaczi ine juhâmoocmu.

²⁶ Moc e jahacne maŋ mamasuo roweckeocmuzi ŋic mutucne eocmu, â moc e ŋic maŋqârâŋhec jaŋere dâŋ mana rereŋ eocmuzi ine juhâc qâhâmoocmu.

²⁷ Ŋic moc e ŋic hapetac bafic-jopaocmuzi sifu wiac moc mi basaocmu, â moc e hapetac hone takic ejareocmu e ine ŋic bocjaha jaŋe sâweckenŋmu.

²⁸ Ŋic sindaŋne jaŋe tâpirihec epie ŋic gâcne jaŋe sorkeniŋmu, â tâpiri-jeŋic omaeme ine ŋic tiŋne jaŋe mocwâc guriŋ bapa gie baniŋmu.

29 Go ŋic jaŋe qa bâtiŋ egarepie sâc râŋgenkecmuo ine dameŋ mocko qanzaŋ banzangupie mocwâc mi jucmu.

² Ŋic tiŋne jaŋe ŋic ŋokac guriŋ bajarehapie zeri bari eniŋmu, â ŋic sindaŋne jaŋe guriŋ bajarehapie ine ki busâqoc eniŋmu.

³ Go maŋqârâŋte manatec wiac furi sâko eha mamacgezi gore maname fefene eocmu, â moc e sasec ŋokac jaŋerao qohotaocmuzi ine moneŋ mafa wiac-ticne sipirickeocmu.

⁴ Ŋicwofuŋ moc e guriŋ bapa gie tiŋne baocmuzi mâreŋ-ticne bafahareocmu, â moc e monenŋte sawa manasuhuc gie baocmuzi ine mâreŋ-ticne ima baocmu.

⁵ Ŋic moc e âgofâcne wokemaŋ dâŋ ejareocmuzi e jahacne bitiŋ baocmu.

⁶ Ŋic hehesicne jaŋe jaŋacne hehesiczi bitiŋ ejareha razipie kicjopaekac, â ŋic siocmâc jaŋe ine bubiaŋ faio rambaŋ juengopieŋ.

⁷ Ŋic tiŋne jaŋe qarâ suriŋne jaŋere dâŋ dopeckeengopieŋ, â ŋic sindaŋne jaŋe ine jaŋere mana mezac moc mi eengopieŋ.

⁸ Ŋic pepec penaroŋ jaŋe hae moc irec rune maŋbâiŋ ejareniŋmu, â ŋic maŋqârâŋhec jaŋe ine buuruc qajareniŋmu.

⁹ Ŋic maŋqârâŋheczi ŋic mutucne moc dâŋgieo râeocmuo ine ŋic mutucne eki mâc gâwiecneocmu, erâ wâc aaric manacnehuc dâŋ sâqocne mucneocmu.

¹⁰ Ŋic socnânâ jaŋe ŋic sioc tâmiric qaisockeengopieŋ, â ŋic tiŋne jaŋe

ine juju-ticne ɳezickeengopienɳ.

¹¹Ŋic mutuc matacne jaɳe kimben aaric-jenɳic mi bawahahuc tomao batanɳkeengopienɳ, â ɳic maŋqârâŋhec jaɳe ine wiac iɳucne hetapaickehuc uruerâ juengopienɳ.

¹²Guriŋ bapa ɳic moczi burecdânɳte hazec râeocmuo ine gienɳicfâc-ticne feɳicne jaɳe burecɳic jaha efâreniŋmu.

¹³Ŋic hapetac mecne â kisâfâc-jenɳic mecne jaɳe mâmâc Wofunɳzia zâɳe hândân râe-jarewec.

¹⁴Ŋicwofunɳ moc e ɳic waha qaqaɳe jaɳe dopec-jopaocmuo ine guriŋ bapa gie-ticne i damenɳ zora barahuc juocmu.

¹⁵Naru motec jaɳerao mumutiŋ â bâbâtiŋ gie bapene bianɳkeocmu, me jaɳe jaɳacne maŋte wiac ebac eniŋmuo ine nengocfâc-jenɳic mimi qaqa ejarenɳmu.

¹⁶Ŋic sindaɳne jaɳe guriŋ bapa gie bahuc juhapie wiac sâqocnezi soka ɳedâmârec eocmu, â ɳic tiɳne jaɳe ɳic sindaɳne wahâ jopame honec-joparâ zeri eniŋmu.

¹⁷Go ɳokâɳe qa bâtiŋ ecnetec nenenɳ bânenenɳ mi egareha ere bubian manahuc juocmu.

¹⁸Ŋicguru moc jaɳe Anutu guriŋ bapa-ticnere takic-jopame sâcmutâc tâmiric kosa juniŋmu, â ɳicguru moc jaɳe Anuture sâcmutâc dâŋ mana rerenɳ eniŋmu jaɳere manapene zerine eocmu.

¹⁹Go kiŋaŋ qaqa moc dâŋ sawa âzâcnehuc sâcne mi bâtiɳnecmu, ine dâŋɳe hazeczi sawa manahuc mana rerenɳ mi eocmu.

²⁰Ŋic moc e dâŋticne manasu biric mi ehâmohuc kosa muocmu e ɳic mutuc matacne jaɳere waha micne erâ juocmu.

²¹Kiŋaŋ qaqa moc e qieonecteaŋ wiac irec me irec mume râcne tahac enaŋmuo ine juku sokarâ wiac-nâŋec sasawa ro rauc eocte muocmu.

²²Ŋic maŋzocheɳ jaɳe mu qaqatarac erâ dâŋgie sâko bâfuaengopienɳ.

²³Ŋic pepeɳ penaroŋhec jaɳe waha jopaocmu, â ɳic maŋhuhunɳ juenɳgopienɳ jaɳere manapene fefene eocmu.

²⁴Hata kecziɳuc fokacte fiuc roro ɳic ere babaficzi juju-ticne qaisockeekac: E dâŋgieo domahuc dâŋ fârine mufuame bâtiɳneniŋmu, â dâŋ fârine hesoŋkeocmuo ine Anutuzi sâweckeocmu.

²⁵Ŋic jaɳere hâhâwic bajupene bitiŋzi kicnâpoocmu tinac eocmu, â Wofunɳtao roweckehuc junaŋmuo ine eki huec sanaɳ enâreocmu.

²⁶Ŋic bocjaha jaɳe ɳic feɳicnezi mana-jareme bianɳkeocte maŋjenɳic domaekac, erâ Wofunɳzi sawa ine dâŋnâŋec mutarama sâckeocmu.

²⁷Ŋic tiɳne jaɳe ɳic sindaɳne qaisoc-jopaengopienɳ, â ɳic sindaɳne jaɳe ine ɳic tiɳne qaisoc-jopaengopienɳ.

Agurure dâŋ

30 Keczi Jakere ɳokâ, Masaɳic Aguru ere dâŋ hâcne:

"Anutu e nohec mi juekacte boc bititieekopac.

²No ɳic mâcne, qowi iɳucne juekopac,
ɳic nâŋâc mamanahec erâ junaŋte mukicne mamana i no mi fonarekac.

³No maŋqârâŋhec jupemurâ mamana gie moc mi bapo,
irec no Anuture funɳne kâuc baekopac wâc.

⁴ Mozi moc sambânko ferâ mocwâc risie wahawec?

Me mozi mângân moc basanangkewec?

Me mozi qoruc-ticne rorâ opâ moc forgekewec?

Me mozi mâreŋ qareŋne râe basanaŋ efârewec?

Go ɲic e jahacne me ɲokâ-ticnere zâŋe moc manakicko muc!

⁵ "Anutu e mumupaŋ dâŋticne sasawa irec fârine bâfua-fâreekac, â ere dapeŋko soŋkeengopieŋ jaŋe ɲezic-jopa-fâreekac. ⁶ Anutu e tutuc qagarehuc burecɲic mugarezacte eki dâŋ muwec ira gahacne maŋte dâŋ moc mi zuhuckezemec."

Muqâqij dâŋ gâcne gâcne

⁷ O Anutu, no hâmoc dameŋ-nane mi maickeha wiac jajahec jahere numu-garepe mana-narezemec: ⁸ Burec â waburac ezipore baficnuzemec, ehuc tâpîri-nanere sâc moner mafa nare tahac ezemec, â nânâ wiac i hobu-nanere sâc sawa narezemec. ⁹ No nânâ mafa sâkohec erâ, "Go tâmiric sâcne jupemu," iŋuc muhuc behecguzipore me hapetac juhuc fiuc rorâ Anutu gore zâŋe wâwânâŋ ecnezipore iŋuc hâcne enarezemec.

¹⁰ Go kiŋaŋ qaqa mocte fuŋne bomboŋ-ticnerao mi musâqorezemec, go iŋuc etec sâwecgume zâic busâqoc manazicte.

¹¹ ɲic gâcne jaŋe mamacfâc-jeŋic sâwec-jopaengopieŋ, ehuc neŋgocfâc-jeŋic jaŋere manapie fefene wâc mi eekac.

¹² ɲic gâcne jaŋe sohoŋhec juipiehuc jaŋacnere manapie qaqaŋe juggopeneŋ tinac eekac.

¹³ ɲic gâcne jaŋe jaŋacnere manapie fefene eha ɲic âgoŋfâc-jeŋic jaŋere, ine manapie wawahane eekac.

¹⁴ ɲic gâcne jaŋe hapetac â qarâ suriŋe kisuec-jopahuc wiac-jeŋic jowac roengopieŋ, jaŋe iŋuc ehuc jaŋacne juju dopeckeengopieŋ.

¹⁵ Hurameŋ e otâ jahec-ticne jajahec jukopirec jahere zâŋe mocjaha zɲiŋuc fokac: "Narec, Narec."

Wiac jahec â jahec kecziŋuc jaŋe nâ gapec moc mi eengopieŋ:

¹⁶ Hâmoc hae,

ɲokac hufiŋe,

mâreŋ kereŋne

â zocbârũ.

¹⁷ ɲic moc e neŋgoc mamac jahec-ticne jahe ɲic ɲokac qizec ehapiere gâwie-jactehuc qaisoc-jofaocmu e kâec kâec wipezi zâŋe-ticne ripozejec â tucwipezi sahac biuc-ticne nâzejec.

¹⁸ Wiac jahec â jahec kecziŋuc jaŋere fuŋne qame hukicne fokacte mi mana taraekopac:

¹⁹ Moc i tucwipezi sawao rac warec eekac,

â moc i homazi haroŋaŋ faio foforâ raekac,

â moc i wokezi hata-ticne bâfuarâ hâwec fotâcneekac,

erâ moc ine ɲic ɲokac jajahec jahe maŋ rââec

eekopirec.

²⁰ Boe sau ɲokaczi wiac zɲiŋuc eekac: E sasec gie barâ opâ ruahuc zɲiŋuc muekac: "No bahac moc mi bâfuapac i."

²¹ Wiac jahec â jahec kecziŋuc jaŋere manapene mi eene eekac:

²² Kiŋaŋ qaqazi ɲicwofuŋ erâ juju,

Ńic sindaŃnezi nănă măriri săkohec juju;

²³ Ńokac qaisockekicnezi Ńic roro,

eră kiŃaŃ naruzi Ńokac bombon-ticne âăkehocke.

²⁴ Qowi jahec â jahec kecziŃuc juŃgopieŃ jaŃe piticne jămbăŃ eră sifu mamana tarahec: ²⁵ QozazaŃ jaŃe tăpiri tămiric eră sifu zoaŃ damenŃko nănă wiac-jenŃic ro qăzuc efăreengopieŃ. ²⁶ MandaŃ jaŃe tăpiri tămiric jaha eră sifu mărēŃ gufură fic hae eengopieŃ. ²⁷ Hăpic jaŃe ŃicwofuŃ tămiric juhuc sifu birihec raengopieŃ. ²⁸ Zereac jaŃe mezi roroc-jopane, eră sifu ŃicwofuŃte ficko juengopieŃ.

²⁹ Wiac jahec â jahec kecziŃuc jaŃe hata rahapie honec-jopahuc aŃac-năpoekac: ³⁰ Moc i laiŃ; e tăpiri-ticnezi qowi găcne jaŃere tăpiri sirickeha wiac irec me irec moc mi hăwickeekac. ³¹ Â moc i noniŃ â qăqăc Ńicne, eră moc i ŃicwofuŃ jaŃe momorifăc-jenŃic micne bajareengopieŃ.

³² Go mutuc eră pepec penaroŃ ehuc wiac hehesicne manasu biric moc emenŃko ine beheră mocwăc mamana gie bazemec.

³³ Susu kiruŃko itiriŃkekupene wokemaŃ fuaekac. Ńic moc e săkenao hepene soc ruaekac, â Ńic maŃbăiŃ ejarepene zika fuaekac.

ŃicwofuŃ mocte uŃsawaŃ dăŃ

31 ŃicwofuŃ Lemue e nengoc-ticnezi dăŃ kecziŃuc âzăcne qazuc ewec:

² "Joroc Ńokă-nane, go nunumu-nanere fărine hăcne, no wemo dăŃ moc gazapemu? ³ Go tăpirige sasec gieo mi qămiezemec, â monenŃe i Ńokac jaŃerao mi sipirickezemec. Manakic, iŃucne jaŃe ŃicwofuŃ wăc sipiric-jopambiŃ. ⁴ O Lemue, go manac: ŃicwofuŃ jaŃe waiŃ opă mi nănzepieŃ, â opă sanaŃ găcne irec andac wăc mi enzepieŃ. ⁵ JaŃe opă sanaŃ năhuc săcmutăc dăŃte nikec-jopaekac, ehame Ńic qară suriŃne hone takirec-jopaengopieŃ. ⁶ Opă sanaŃ i Ńic zăic săko manahuc hămozo engopieŃ jaŃere biŃe. ⁷ JaŃe hăcne năhuc bawaha qaqane â busăqoc faio juengopieŃ irec nikec-jopazeŃec.

⁸ "Go Ńic năŃguŃne â ba bititicne jaŃere dăŃ muhuc bafic-jopazemec.

⁹ Go jaŃe bafic-jopahuc dăŃjenŃic mutiŃnezemec, ehuc Ńic waha qaqane â qară suriŃne jaŃere dăŃ făretiŃ jaha muhuc dopec-jopazemec."

Ńokac biăŃnere dăŃ

¹⁰ Mozi Ńokac biăŃne moc săcne băfuaocmu? Ńokac biăŃne moc e qănă furi săko irec săc sirickeekac.

¹¹ Ehame Ńowe-ticnezi erao roweckeră juhuc batac qatac mi eocmu.

¹² Ńokac iŃucne e juŃeekac săc Ńowe-ticne busăqoc moc mi băfuacnehuc biăŃne jaunŃkehuc juekac.

¹³ E qăoma moc mi ehuc he fufu â Ńaqi qoruc qăqătă gie zuzuhuc jaha baekac.

¹⁴ E mafa woke iŃucne nănă wiac mărēŃ zorickonec rome fisiekac.

¹⁵ E furic qărurure fahareră wiacfăc-ticne jaŃere nănă rike bămoc ehuc kiŃaŃ narufăcne giedăŃ mujareekac.

¹⁶ E gie hehe mărēŃ moc honeră e jahac gie bahuc monēŃ hotăckeekac izi furine baocmu.

¹⁷ E gie zoqac sasanăheh baekac.

¹⁸ E wiac ebac ehuc irec maname fârîne sasawa eekac, ehame gie bahuc juhame ŋafe zâŋiŋkeekac.

¹⁹ E he fuocte muc jâmume feekac.

²⁰ E ŋic hapetac â qarâ suriŋne jauŋ bacjopaekac.

²¹ E wiacfâcne jaŋere zoc bocjaha roekacte mâmâtenj damenŋko jaŋere maŋa mezac mi eekac.

²² E fofo baekac, erâ wâc ŋaqi qoruc-ticne qâtâekac.

²³ Iŋuc eme ŋowe-ticne e zâŋe biŋehec ehuc ŋic micne juekac.

²⁴ Ŋokac e manguc â hewiac furâ narenj garenj tomao furire râekac.

²⁵ E sasanŋhec jume ŋic jaŋe manacnemie fefene eekac, â juku zâhec wiac fuaocmu irec mi hâwickeekac.

²⁶ E micticnaonec maŋqârâŋ â âgo miriŋ dâŋ sawa wahaekac.

²⁷ E damenj sâc gie zoqachec bahuc wiacfâcne jaŋe hone bafic ejareekac.

²⁸ Ehame naru motecfâcne jaŋe manacnemie fefene eha ŋowe-ticnezi mumbiankeekac.

²⁹ Ehuc ziŋuc âzâcneekac: “Ŋokac gâcne jaŋe bianŋe jaha, goki ine jaŋere sâc sirickehuc bianŋe jâmbâŋ jukomec.”

³⁰ Sahaczi babanic i eatuc-ticnehec â sahac hawari bianŋe i oomaene, ŋokac moc Wofuŋ araj bacnehuc juocmu e ine mumbiankezo.

³¹ E gie-ticne sasawa baekac irec furine rozejec, ehame ŋic ŋokac jaŋe zengoma muac baafec ecnenzepieŋ.